

# ACTA ERUDITORUM

publicata Lipsia

Calendis Maji, Anni MDC LXXXVII.

*DEFENSIO RELATIONIS DE ANTONIA Burignonia, Actis Eruditorum Lipsiensibus Mensis Januarii Anni MDC LXXXVI inserta, adversus Anonymi famosas chartas Amstelodami typis Boetmannianis sub titulo MONITI NECESSARII publicatas. Quarum proterve calumnia refutantur, simulque Fœmina, quæ se Legatam Dei mentita est, ipsiusque Apologetæ & Monitoris, impia & monstrosa dogmata quedam, ex libris utriusque Gallicis Latine excerpta, censura Christianorum in præcipuis Fidei articulis adversus fanaticos consentientium, offeruntur.*

Lipsiæ, apud Joh. Frider. Gleditsch, 1686, in 4.

**T**itulum libri integrum, tametsi prolixiorẽ exhibuimus, ut supersedere possemus argumenti, quod tractat, uberiori & accurato recensu. Nostram causam agi, nemo non videt: quam justa vero ea sit, ex ipsa Apologia, brevi nempe temporis spatio cuique perlustranda, cognosci a benevolo Lectore malumus. Nullius enim viri boni & cordati iudicium subterfugimus, eamque ob causam & illum Actorum nostrorum locum, quo de Antonia Burignonia scriptis disseritur, & anonymi censoris licet longe acerbissimum Monitum, subjungi Apologia huic curavimus. Equidem fuere, qui nihil reponendum Monitori illi censuerunt, tum quod existimationi qualicunque, & in Germania, & in exteris regionibus, Actis illis nostris, per hos quinque annos & quod excedit, apud viros doctos partæ, nihil per eas Anonymi schedas decessisset; tum quod Relationis nostræ de Burignonia operibus



ribus Auctor ea sit professione, ætate & in rempublicam meritis, ut sine famæ optimis artibus partæ dispendio, vindicare calumnias generoso contemtu potuisset. Sed vicissim alii non consultum putarunt honori nostro, ut silentio velut reos nos faceremus injuriæ Burignonix aut ejus advocato illatæ; & Relationis de scriptis fœminæ hujus, illustris Auctor hære in quadraginta mendaciis ab ejus hyperaspiste sibi objectis noluit: & denique interesse visum fuit orthodoxæ Ecclesiæ, ut de Burignonix periculosis dogmatibus & institutis uberius, quam quidem in Actis nostris factum fuerat, omnes publice admonerentur. Hinc natum præfens opusculum, quod æqui Lectoris judicio sic commendamus, ut factam a nobis Burignonix ejusve affectis injuriam non fuisse cognoscat; ad ulteriorem autem cum hujus sectæ hominibus disputationem, minime nos obstrictos cupiat.

M. CHRISTOPHORI SONTAGII  
Tituli Psalmorum.

Silusiæ, impensis Sebastiani Gœbelii, 1687, in 4.

**I**Nter difficiliora Scripturæ loca *Psalmorum* quoque *titulos* reponi, par est. Brevitate enim sua vocumque, e quibus constant, insolentia, tantum negotii interpretibus facessunt, ut parum absit, quin de quorundam sensu investigando jam pridem conclamatum fuerit. Optime igitur putamus factum, quod clarissimus Schleusingensium Pastor ac Superintendens, illustrisque, quod Silusiæ floret, Gymnasii Ephorus, *Christophorus Sontagius* omnes in hanc rem ingenii nervos intendit, ut illis, quantamcunq; posset, lucem fœneraretur. Hac fini excusserat commentaria ac versiones Judæorum æque ac Christianorum, collectisque illorum suffragiis, solícite expenderat, cuinam omnium tutissime accedi posset. Magno vero usui lectoribus fore haud vane opinatus est, si *regulas* præmitteret *hermeneuticas*, seu *aphorismos generales viginti quinque*, quibus continentur *præcognita quædam necessaria de titulis Psalmorum authenticis*, h. e. illis, quos in Hebræorum Psalterio legere est. His dein subnectere visum fuit *titulos*, omnium omnino Psalmorum, *ἀδελφῶν* partim & ab Hebræica veritate nonnihil deviantes, partim *adjecitios* prorsus & *suppositios*, prout quidem in versionibus Chaldaica, Græca, Syriaca, Arabica, Æthiopica & Vulgata Latina exhibentur. Addidit  
heic



heic noster sub paginarum finem scholia, quibus tum phrasæ, tum scopus veterum illorum Interpretum haud parum illustrantur. Succedit tandem princeps operis hujus pars, *Diatribæ* nimirum *sexaginta septem*, totidem titulis explicandis destinata. Quorum plerique quidem authentici sunt; nonnulli tamen e versionibus admixti, qui, etsi parte secunda inter sui similes jamjam recensiti fuerant, rariori nihilominus aut elegantiori loquendi formula accuratiorem prolixioremque disquisitionem mereri videbantur. Cujus generis sunt שיר פנעים *carmen occursum*, quo nomine Rabbini Psalmus XCI venire solet, & Ψαλμός ἐκστασεως *psalmus pro ecstasi*, quem titulum Psalmo XXXI dederunt Septuagintaviralis ac Vulgata Latina; unde de illo pag. 610. de hoc p. 683. cum cura agitur. Imo & viginti duæ Alphabethi Hebraici literæ, quæ totidem sectionibus Psalmi CXIX præfiguntur, itemque vox finalis *Selah*, in quatuor diatribarum argumentum adhibitæ comprehenduntur. Postquam vero doctissimus Autor singulis locis ex sanctioris philologiæ penu largissima manu adpersit, quæ illuc facere credidit, coronidis loco titulum hactenus explicatum pericopæ cuidam *Evangelicæ dominicali aut festivali succincte applicat, monstratque*, qua ratione in Homiliis sacris exordiorum vices commode subire queant. Hac de causa diatribæ non eo ordine sese invicem insequuntur, quo textus illarum in Psalterio disponuntur, sed eo, quem Evangelicarum lectionum anniversaria series postulabat. Quod si seriei biblicæ potior ratio habenda fuisse videatur, commodum subjungitur *index* docens, qua pagina quilibet titulus exponatur; nec locupletissimus rerum & verborum index omissus fuit.

REFLEXIONS PHILOSOPHIQUES ET  
Theologiques, sur le nouveau Systeme de la Nature & de la Grace.

id est:

Reflexiones Philosophicæ & Theologicæ in Systema novum de Natura & Gratia. Liber secundus, de ordine Gratia.

Coloniæ, 1686, in 12.

Gg 2

Dispu-



**D**isputatorum, quos jam sæpe nominavimus, *Arnaldi & Malebranchii* nomina, in titulis licet omiſſa, absque diſſimulatione produntur ab Approbatoribus *secundæ hujus partis*, Theologis Mechlinienſibus, qui tam aperte Arnaldi ſententiam tuentur, ut dicant *Systema Malebranchii* erroribus plenum, & ex Philoſophia male intellecta hauſtum eſſe; eique optent, ut oculos tandem ad lucem hujus libri aperiat, & ſecundum verba Auguſtini (epiſt. 143) *quia non valuerit omnia non penitenda diligenter dixiſſe, peniteat quæ cognoverit dicenda non fuiſſe.* De præſatione libro præmiſſa aliquid relatam eſt, cum Malebranchii nuperas epiſtolas recenſeremus. Inſeruit ei Arnaldus ad exemplum Antagoniſtæ librorum catalogum, quibus inter ſe certarunt, & quos legi debere putat ab iis, qui de cauſa quam tractant judicare velint; poſcit dein ſpeciatiim, ad quæ legitime reſpondere adhuc debeat Malebranchius, repellitque ejus excuſationem, ſi videri velit (ut jam jaſtaverit) ex obſequio potius erga amicos, quam cauſæ diſſidentia ſiluiſſe. *Liber hic ſecundus* (de primo in Actis A. 1686, p. 183, diximus) capitibus XXXIII abſolvitur. Quatuor priora directæ ſunt adverſus aſſertum Malebranchii, *quod Deus in creatione mundi nullum aliud propoſitum habuerit, nec habere poterit, quam ſtabilimentum Eccleſiæ.* Hoc neque ex Scriptura probari poſſe dicit Arnaldus, neque principium ex quo illa aſſertio deducitur, ſubſiſtere: Neque enim Ideæ de Deo neceſſario ineſſe, quod pro certo ſupponit Malebranchius, *ut Deus nihil extra ſe agat, niſi ad procurandum ſibi cultum ſe dignum,* unde ſequatur, Chriſtum incarnandum fuiſſe, ut talem cultum Deo præſtare poſſet ob unionem naturæ humanæ cum Verbo infinito: negat hoc Arnaldus, nec plus neceſſario ex idea iſta ſequi affirmat, quam quod Deus omnia ex mera bonitate faciat. Confirmat id ex *Thoma & Auguſtino*, itemque ex *Eſtio*: reprehendit etiam, quod Malebranchius honorem vel cultum dignum Deo ab homine præſtari neget; aliter enim loqui Scripturas, dignitatem, ſanctitatem & perfectionem cultui, qui ab hominibus præſtari debet, tribuere. Peccare igitur illum contra ſuas ipſummet regulas, & de Deo loqui more humano, quaſi utilitatem & operæ pretium in omnibus quærat actionibus. Aſſert de in c. IV. ex præcipuis patribus Græcis & Latinis clara teſtimonia, quod docuerint, *Verbum non fuiſſe incarnandum, ſi Adam non peccaſſet; &* quia iſti cum



cum Malebranchio plane non consentiant, arguit inde, ideam ejus de Deo non esse veram, cum patres precibus illis internis, quas semper exaudiri docet Malebranchius, utique non minus, quam ille ad assequendam veritatem usi sint, nec minorem ratiocinandi facultatem habuerint. Jam c. V. ad systema de Gratia accedens, iterum monet, defectum auctoris, & quod suæ legi contravenerit, Deo agendi modum ex humano ingenio præscribendo. Dein c. VI. hypothefin Malebranchianam delineat, & in propositiones *tredecim* distribuit; suam vero cap. VII. proponit, in *octo* propositiones redactam, quas ex Augustini sententia de gratia & prædestinatione sequi putat. Cap. VIII & IX ex Malebranchii ipsius libris quædam loca adducit, per quæ doctrinæ Augustini consentire, & Pelagianismum ac Semipelagianismum serio averfari videatur: quanquam ante ortam hæresin Pelagii incautius locutos esse, & patres Græcos, & ipsum Augustinum, & naturaliter fere omnes ad errorem Pelagii propendere agnoscat. C. X. sententiam Prosperi pro se adducit, & Malebranchium in errorem incidisse putat, dum nimis indulgeret speculationibus *Metaphysicis*, nec quod in aliis reprehendit ipse caveret, *incautas nempe de libertate hominis locutiones, aut præjudicia ex præsumptione de viribus naturæ concepta*. Examinat c. XI. speciatim, an idem sentiat Malebranchius, quod Augustinus ex S. Paulo Rom. IX. & XI. quod judicia Dei circa electionem hominum sint impenetrabilia, idque negat, & c. XII. duo quæri de Dei judicio notat, *primum*, cur aliquos induret, aliis misericordiam faciat; *alterum*, cur hunc potius, quam illum induret, aut ejus misereatur. Ad primum responderi posse cum Paulo, *liberrimum fuisse id Deo, sicut figulo liberum est diversa vasa formare*; ad secundum autem respondisse Apostolum per admirationem & allegationem *impenetrabilitatis*: hæc vero confudisse existimat adversarium, & ad secundum etiam quæsitum, respondendi modum, qui Paulum latuerit, excogitare voluisse, novo illo systemate suo. Disputat per occasionem adversus sententiam *Reformatorum*, quod justificati omnes perseverent, & quod fide divina certitudo perseverantiæ credi debeat, & ex Augustino (qui donum perseverantiæ a Deo ex causis plane impenetrabilibus dari, aut negari statuit) docere vult, quod fideles de perseverantia dubitare, & pro ea obtinenda tota vita orare Deum debeant. Cap. XIII. de prædestinatione & præscientia ex Prospero tractat, contra Semipelagianos, qui pro una habebant



utramque: *prædestinare scribit Deum & præscire, quæ ipse facit, præscire sed non prædestinare, quæ permittit, v. g. peccata.* Itaque *præscientia* (ait) *includitur prædeterminationi, nostroque concipiendi modo, hæc est posterior, quia ideo Deus prævidet futura, quia ipse, ut fierent, decrevit.* Secundum hæc intelligi aut corrigi debere, quæ Malebranchius scripsit, quod *prædeterminatio electorum præsupponat præscientiam operum, quæ facturi sint auxilio gratiæ; ita enim vera hæc esse, si intelligantur de auxilio gratiæ efficacis per se.* Sed capite XIV doctrinæ orthodoxæ congruere negat, quæ pro ratione iudicii divini noviter invenit Malebranchius, quod Deus pro sapientia sua non agat voluntate particulari, & quod hanc voluntatem pro cæca & imperiosa habeat, quæ Deo non conveniat. Afferit autem Arnaldus cap. XV. contra hoc dogma ex Augustino & Prospero, quod Deus utique particulari & benevola voluntate electionem & prædeterminationem faciat, & explicat dicta Pauli ad Eph. I, 5. 6. & c. II, 4. 5. 9. in quorum priori Paulum a principio ad effecta descendere dicit, in altero ab effectis ad principia redire. Addit ejusdem Apostoli doctrinam ad Rom. VIII. 28. 29. 30. cui plane non convenire dicit tradita Malebranchii de simplici illo agendi modo, quem Deo tribuit. Subjungit denique explicationem difficillimi capituli IX ad Rom. ad quod veluti ad scopulum semper alios esse dicit, prædeterminationis gratiæ inimicos. Quoniam vero Malebranchius argumenta ex dictis Scripturæ pro voluntate particulari, exceptione sua de anthropologiis elidere solet, & dicta ista per alia, quæ de voluntate Dei generali loquantur, explicari debere contendit, cap. XVI objectiones illas vehementer impugnat Arnaldus, & negat, ullum dictum ex Scriptura afferri posse, quo probetur, Deum in electione, aut in prædeterminatione & sanctificatione electorum, voluntate generali agere. Censet ergo, totam adversarii machinam non nisi idea illa Dei, quam concepit, niti, adeoque petitionem principii esse; inhærendum itaque sensui literali dictorum esse monet, & ad anthropologias confugi non debere, nisi de sensu metaphorico aperte constet. Cap. XVII. monstrat, opinionem adversarii cum doctrina Augustini minime convenire, & hunc ad objectam ab hæreticis acceptionem personarum, quam ex dogmate de electione absoluta colligebant, alio plane modo, quam Malebranchium ex hypothesi de voluntate generali, respondere. Non vult tamen huic propterea Pelagii hæresin imputare. Pluribus



vero cap. XVIII refellit ejus asserta, ubi eadem se docere dicit, quæ S. Paulus & Patres docuerint, & cap. XIX ostendit, voluntatem illam Dei particularem, quam is cæcam & cerebrosam vocat, eam ipsam esse, quam Apostoli & patres Deo tribuant, ignari plane novæ illius de Deo ideæ. Ne vero ea quæ hucusque adversario opposuit, pro *Jansenismo* traducantur, ex tribus recentibus autoribus, qui de hac materia Gallice scripserunt, dicta sua de prædestinatione gratuita firmatum it, adscriptis *Amelotti*, *Thomassini* & *Porcii* locis. Cap. XX imo & *Jesuitas*, quanquam de gratia statuant, quæ probanda non sint, teneri tamen asserit, ex decreto *Generalis* sui *Claudii Aquavivæ* An. 1613. publicato, ad docendam prædestinationem gratuitam. Monstrat inde cap. XXII. male factum a Malebranchio, & ad *Protestantium* potius, quam Catholicorum exemplum, quod patrum, & imprimis Augustini testimoniis omissis, solum ex ratiocinatione & Scripturis hypothesin suam stabilire voluerit. Post hæc regulas sive propositiones Malebranchii, quas capite VIII formaverat, sub incudem revocat, & verba Scripturæ, quæ dicunt, *Deum velle, ut omnes homines salventur*, de voluntate absoluta, non conditionali; vocabulum vero *omnes* ita explicat, ut citatis Patrum & Theologorum autoritatibus, homines non in universum omnes, sed *omnis generis* & conditionis, id est electos significet. Objectioni vero Pelagianorum longe melius cum Paulo & Augustino, quam ex hypothesi Malebranchiana occurri posse statuit. Hanc vero c. XXIV. & XXV plurimis rationibus destruit, refutans etiam novissimam ejus exceptionem in responsione ad *dissertat. suam de miraculis Vet. Test.* ubi dixerat: *Deum quidem regulariter ut causam universalem agere, sed particulari voluntate uti, si ordo id postulet.* Postulari enim ait omnino particularem voluntatem, si verum esset principium, quod Deus omnes salvos esse velit, & quod Christo propositum sit templum spirituale Ecclesiæ quam maximum & amplissimum facere. Indicat cap. XXVI contradictionem ex principiis adversarii, dum ex una parte statuit, Deum generaliter velle salutem omnium, ex altera, quod per sapientiam suam invincibiliter prohibeatur, ne particulari voluntate propositum illud exequatur; imo pro blasphemia fere habet, quod dicat, *minus decere Deum particulari voluntate agere, quam generali*, cum tamen fatente adversario, particulari egerit in *creatione universi*, & in *formatione animantium*, & etiamnum ea agat in *patrândis miraculis*. Pro-



nuntiat itaque temerarium & insolens esse de secretis Dei, & quid eum magis minusve deceat, judicare ex sola idea Entis perfecti, sine revelationis divinæ adminiculo. Sic enim judicantes paganos, doctrinam de Christo pro stultitia habuisse. Adducit insignem Episcopi Meldensis locum *ex dissertatione de hislor. universali*; arguit inde multa, quibus libertati Dei per ideam istam novam derogetur. Denique repetita per compendium adversarii argumentatione, etsi concedatur, quod Deus voluerit omnes homines salvos fieri, deinde quod se atque sapientiam suam naturaliter quasi & necessario magis amet quam homines, adeoque agere teneatur modo sapientiæ suæ convenientissimo: negat tamen subsumi debere, aut probari posse, Deum modo se non digno agere, si salutē hominum particulari voluntate procuret; imo si verum sit primū illud assertum, quod Deus velit omnium hominum salutem, sequi potius, ut teneatur omnibus, adeoque & particularibus modis eam procurare, aut si hoc non faciat, manifestum esse, primum illud assertum, quod omnes salvos velit, non esse verum, nec demonstratum. Cum vero Malebranchius sæpe pro ratione alleget, Deum ita agere debere, *ut character attributi sui magis appareat*, indeque deducat, ex voluntate particulari attributa divina non æque, quam ex generali apparere; hoc assertum cap. XXVII in disquisitionem vocat, multisque rationibus impugnat: nobilium enim & dignius esse ait, Deum particulariter velle & statuere, quam solum exequi voluntate generali, quod causa occasionalis exequendum suppeditet; & quod in opere salutis Deus sit supremus architectus, Christus vero ut homo voluntatis divinæ executor. Dein attributa divina, sapientiam & immutabilitatem, minus recte intelligi & explicari dicit ab autore novi systematis, & male omitti cætera attributa, ad quæ in negotio salutis respici debent, voluntatem liberrimam, potentiam, misericordiam, justitiam & bonitatem. Miratur itaque cap. XXVIII, cur *Episcopus Ascalonitanus suffraganeus*, & *ensor librorum Moguntinus* approbaverint, laudaverintque librum *Meditationum Christianarum* a Malebranchio editum, & deceptos esse putat ambiguitate terminorum generalium; nec satis penetrasse, quo sensu iis utatur Autor, qui eo tendat, ut Deum nihil agere statuatur, nisi quatenus voluntas ejus generalis determinetur a causa occasionali, ideoque nec in conversione hominis finem particularem habeat, aut bonitatem specialem erga eum exercent, sed solummodo sequatur determinatio-



nationem causæ occasionalis; cum tamen hæc opinio directe contradicat D. Paulo, qui docet Deum operari in nobis & velle & perficere, *pro bona voluntate*. Phil. II, 13. Verum esse ait cap. XXIX, nec Theologis ante Malebranchium incognitum, Deum leges generales in ordine gratiæ sibi præscripsisse, quas ordinarie sequatur, sed non sequi, quod non agat nisi voluntate generali, nec, quod infert Malebranchius, Deum tentari, nisi ejus sententia probetur. Adducit & laudat locum ex tractatu, cui titulus est *Conatus sive specimina moralia, (Essais de Morale)* ex quo conciliari optime posse putat decreta Dei, cum officio hominum in sequendis mediis salutis. Falli igitur adversarium, dum putet probari ex usu mediorum, quod Deus solummodo agat voluntate generali, determinanda a causa occasionali; *argumentum enim ideo non procedere, quia determinatio illa cause occasionalis, in negotio salutis non pendet ab homine*: alias ejus desideria, preces aut contritiones gratiam mererentur aut allicerent, & ita salutis initium facerent, id vero dicere, esset Pelagianum: omnia enim ista (ait) a Deo sunt, *non solum gratia ipsius collatio, sed & præparatio ad gratiam*. Etiam si vero inter media salutis aliquod videatur esse causa occasionalis alterius, talis tamen non est respectu Dei. Omnia enim media, nullo excepto, simpliciter sunt a Deo; unde sequitur Deum omnia, & particulariter, minime vero generaliter & prout a causa occasionali voluntas ejus determinatur, agere. Notat hic Malebranchium causam occasionalem in Christo ponere, sed etiam illam assertionem Scripturæ & rationi plane adversari *in libro tertio* ostensurum se esse promittit. Cap. XXX. refellit prætextum Adversarii, quod ex sua hypothese *Deus amabilior fiat hominibus*: neque enim ideo licere ex regulis revelatis egredi cum periculo incidendi in alia extrema, quod, monente Augustino, accidit v. g. iis, qui ut Deum amabiliorem ob misericordiam facerent, etiam dæmones salvaturum esse statuebant. Ita errasse ex Reformatis *Brugierium*, a se refutatum, qui Dei amorem exaggeraverit, quod eo electos etiam mortaliter peccantes complectatur. *De bonitate enim Dei ita sentiendum esse, ne violetur ejus sanctitas*. Quapropter nihil effici existimat figmento illo aut prætextu, neque scrupulum eximi iis, qui vel bonitatem, vel potentiam Dei desiderant, si aut nolit omnes salvos fieri, aut non simpliciter efficiat, ut fiant. Postremis tribus capitibus XXXI, XXXII, XXXIII, recapitulatione nervosa argumentis & demonstrationibus Adversarii, tam a priori quam a posteriori.



steriori, respondet; notatque speciatim, quod istandem ipse fateatur, principium illud, *quod Deus non agat voluntate particulari*, ex rationatione, non vero ex dictis Sacrae Scripturae dependere. Dein de gratia Christi, quam ex Augustino definit *inspirationem dilectionis, ut cognita sancto amore faciamus*, ejusque efficacia quaedam monet, ex doctrina Thomistica; per quae objectionibus Malebranchii satisfieri putat. Efficaciam autem gratiae confitetur ipse; sed ad eum modum & effectum, ad quem data est: licet enim non semper salvet eum cui datur, effectu tamen non carere, v. g. si malo homini detur aliquis gratiae gradus, ut moderatior fiat in vitiis, quae fidelibus nocitura essent; peccatoribus etiam vere & finaliter convertendis non detur una vice omnis gratia, sed tantum quantum placet, donec tandem complementum ejus accipiant, quo salventur. Unde apparere ait, Deum semper voluntate particulari agere, diverso licet gradu aut fine. Objectionem vero Adversarii, quod gratia non satis efficax ad salutem, noceat homini, eumque peiorem & inexcusabiliorem faciat, impiam esse; nam culpam ob neglectam gratiam malitiae hominis imputari debere, non minus ac indurationem, qualem de Pharaone narrat Scriptura, cujus causa tamen fuerit Pharao; etsi Deus praeviderit ejus & aliorum indurandorum malitiam & pervicaciam. In summa, negat nova Malebranchii hypothesis, a sapientia Dei per causas generales operantis deducta, difficultati occurrere, quae ab omni tempore Theologos exercuit, tam Catholicos, quam quos putat haereticos, de conciliatione gratiae universalis cum effectu particulari, & si ista hypothesis alicujus valoris esset, & ex rationatione metaphysica erui potuisset, dubitandum non esse, quin dudum Doctores Ecclesiae illam invenissent. Concluditur narratione de judicio sapientis & docti Episcopi cujusdam, qui lecto *Tractatu Malebranchii de natura & gratia*, verbis Augustini usus fuerit: *nova sunt quae dicitis, mira sunt quae dicitis, falsa sunt quae dicitis*; sed addit, quae is retulerat: *nova cavemus, mira stupemus, falsa convincimus*.

JOH. ADAMI SCHERZERI, THEOLOGI  
Lipsiensis Primarii, Breviarium Theologicum  
Hülsemannianum, Eucleatum atque Auctum.

Lipsiae, apud Joh. Christoph. Tarnovium, A. 1687, in 4.

Inter



**I**Nter ea, quæ *B. Hulsemannus*, Theologus p̄sum Wittebergensis, deinde Lipsiensis primarius, deque tota Ecclesia meritissimus, Orbi Literato reliquit divini ingenii sui monumenta, non postremum est Breviarium ejus Theologicum, anno hujus seculi XL sine supplemento, cum eo post octennium editum, ac deinde semel iterumque, hic alibique recusum. Multa vero cum paucis complexus esset, nervoseque expressisset Autor ingenii judicii que maximi; legentium autem non pauci plenius pleraque planiusque deducta legere percuperent: non gravatus fuit ipse Adnotationes publice in cathedra subicere; quæ cum aliis non dissimilibus ejus scriptis A. LXXIIX, studio ac cura *B. Scherzeri*, uno in Volumine publici juris sunt factæ. Verumenimvero cum ne sic quidem exhausta essent omnia, quæ nervosissima profunditate ac sublimitate viderentur contineri; idem facile passus est sibi hoc, quicquid est, oneris imponi, ut sua ope atque opera, quicquid quasi latuisset hæcenus, extraheretur omnino clareque luci publicæ exponeretur. Debebat nimirum hoc affectui suo in *B. Hulsemannum*, præceptorem de se optime meritum; debebat precibus ac monitis amicorum, quos inter ipse *B. Calvinus*, gener *Hulsemanni*; cujus literas, quas ex hac causa ad ipsum dederat, nos quoque vidimus atque legimus. Postquam itaque intra privatos parietes primum, coram frequentissimo Auditorio, hunc laborem A. LXXIX & LXXX maximam partem absolvisset, & post pestem, qua sævienter hoc filum abrumpere coactus fuerat, residuum adjecisset; de hoc suo utilissimo labore typis imprimendo cogitavit quidem, sed morte præventus, quasi posthumum eum commisit illis, ad quos ulterior ejus cura pertinebat. His vero adcurantibus, sub ipsum hujus anni auspiciam in publicum prodiit, ita quidem, ut in eo textus Breviarii in singulis capitibus atque supplementis, se junctus hæcenus atque dispersus, sit unitus & expositus, dicta *S. Scripturæ* olim citata tantum, in formales & manifestas probationes, adjecta exegesi necessaria maximeque utili, appareant redacta, & errores Adversariorum, qui modo nominati fuerant, legantur expressi, ac dictorum Biblicorum rerumque Indices perquam accurati sint sub juncti. Præterea, ne quid ullo modo deesse videretur, toti Operi præfationem, singulisque Capitibus Tabulas præmisit Vir Maxime Reverendus *D. Val. Alberti*; qui etiam, ut reliqua, quæ *B. Scherzerus*, affinis ipsius, dum viveret, conjunctissimus, ad proclum subeundum apta



maturaque reliquit, scripta Orbi Literato decenter communicari possint, nihil prorsus in se desiderari patietur.

*HIERONYMI FABRICII AB AQUAPEN-  
dente Opera omnia Physiologica & Anatomica.*

Lipsiæ, Sumptibus Johannis Friderici Gleditschii,  
A. 1687, in fol.

**E**Tiamsi censeari possit, editorem præsentium operum præposteris consiliis usum fuisse, quod vetusta hæc scripta, delicato hoc tempore, de novo imprimi curaverit; ubi innumeri Apollinæ arti addicti adeo fastidientis sunt stomachi, ut nil penitus nisi nova admittant, antiqua cuncta, vel solo nomine audito, statim averfantes ac respuentes: nihilominus cum hæc absurda nausea non sit adeo universalis, quin cordatiores Medici hodie etiam ex antiquorum scriniis, veritatem situ licet squalidam depromere gaudeant; idcirco ipsos non solum calculo suo probaturos hanc editoris curam, sed etiam opus hoc avidè expecturos speramus. Commendat enim illud sese *Lectoribus non uno* ex capite, imprimis tamen raritate sua singulari. Hactenus namque vix centesimum Medicorum cuncta hæc Anatomica scripta legisse aut saltim vidisse, si dixerimus, a veritate aberrabimus nulli. Factum autem hoc est, quod seorsim partim superiori seculo, partim circa initium præsentis illa in Italia luci fuerint exposita, adeoque jam pridem in bibliopolarum tabernis, apud quos prodierant, disparuerint. Et licet postmodum Francofurtenses, Regiomontani, & non multis abhinc annis Amstelodamenses, quædam illorum typis iterum descripserint, nondum tamen singula publici omniumque juris sunt facta, ut maxima pars eorum, æque ac antehac, ad manus paucissimorum pervenerit. Cæterum possemus quoque opera præsentia ob eruditionem multifariam ac doctrinam oppido raram de prædicare, utpote quæ jam dudum quam plurima docuerunt, de quibus nostri ævi scriptores tanquam noviter inventis triumphant; ast quoniam de hisce æque ac aliis Auctoris encomio inservientibus præfatio Dn. D. Bohnii P. P. in nostra Phylurea celeberrimi, operibus hisce præfixa sufficienter loquitur, nihil amplius addimus, ne præter rem videamur nimii. Accipe ergo solum L. B. syllabum tractatum, quibus opera hæcce constituentur.

Primus



Primus est de formatione ovi & pulli; sequuntur deinceps de formato fœtu, de gula, de ventriculo, de omento, de varietate ventriculorum, de intestinis, de mesenterio, de venarum ostioliis, de respiratione & ejus instrumentis, de oculo, de aure, de larynge, de locutione, de brutorum loquela, de motu locali animalium secundum totum, de gressu, de volatu, de natatu, de reptatu, de musculi fabrica, actione & utilitatibus, de articulorum structura, actione & usu, & denique de integumentis totius animalis. Ad calcem operis index rerum & verborum locupletissimus est adjectus, tractatibus vero ipsis copiosæ figuræ æri insculptæ ad explanationem textus facientes insertæ deprehenduntur non inelegantes.

## HORTI ACADEMICI LUGDUNO BATAVI

*Catalogus Plantarum, auctore Paulo Hermanno*

*Medicina ac Botanices Professore.*

Lugduni Batavorum, apud Cornelium Boutenstein,

A. 1687, in 8.

**N**ihil solidi ex Botanicis a temporibus Dioscoridis, imo ipso Theophrasti ævo, orbem vidisse literarium, in turpe antiquitatis opprobrium commemorat Fabius Columna. Nos jam contrarium optimo jure affirmamus, postquam nempe Zannonius, Syenius, Morisonus, Muntingius, Breynig, Ammannus, Dodartus, Triumphettus, Rajus, & nunc quoq; Hermannus artem hanc excolere, intimiusque in plantarum ac fruticum naturas penetrare cœperunt. Remotis namque fatali credulitate, vana persuasione, ridiculaque superstitione, nomina olim herbis imponentibus, ex solo naturali caractere rectius singularum plantarum fieri appellationem demonstrarunt. Non vacat speciatim Botanicorum supra nominatorum insolitos labores examinare, dignisque præconiis extollere; Hermannus solummodo notitiam plantarum exquisitam, studiumque rei herbariæ summum in præsentiarum deprædicationibus. Hicce enim postquam a teneris statim unguiculis studio Botanico animum applicuisset, fundamentis hujus scientiæ tam in Germania, quam Italia aliisque regionibus positis, ad Indos quoque excurrere non detrectavit; ubi etiam per aliquot annos hærens, non minus perfectam ac raram herbarum exoticarum notitiam sibi comparavit. Et ne forsân L. B. ex affectu nos hæc protulisse credas, inspice, quæso,



ipſe catalogum, & niſi veritatis impudentiſſimus fueris hoſtis, aut plane peregrinus in Botanicis, dubio ſine nobiſcum fateberis, noſtri temporis Botanicorum facile principem eſſe Hermannum. Quo vero præguſtum ſaltem aliquem habeant Botanophili, antequam ad manus ipſorum perveniat hoc ſcriptum, ſciant hanc methodum adhibuiſſe Auctorem, ut juxta Alphabeti ſeriem nomina plantarum horti Lugdunenſis ſuis legitimis characteriſticis notis convenientia recenſeat, reliquis, ſynonymis puta, virtutibus, aliisque ad hiftoriam ſpectantibus omiſſis. Ne tamen propterea manca ſit illarum deſcriptio, hinc inde autoris cujuſdam librum ac paginam, qui ſufficienter ea pertractavit, allegat. Sed cum plures præterea plantas a nemine hucusque deſcriptas Noſter quoque ſuo in horto coluerit, nomina quædam excerpta e catalogo, æſtimatoribus exoticarum plantarum dabimus. Sunt vero ipſa *Aloes Americana minor*, *Albea ricini folio Virginiana*, *Cardiaca Americana annua nepete folio floribus brevibus phœniceis villoſis*, *Cnicus perennis cœruleus Tingitanus*, *Colutea Zeylanica argentea tota*, *Convolvulus maritimus Zeylanicus folio crasso cordiformi*, *Crotalaria hirsuta minor*, *Geranium Africanum folio ibiſci, betonica*, *al. himille, uve criſpe*, *Milium Indicum arundinaceo caule granis flavescensibus*, *ſ. nigris*, *Nerium anguſtifolium Indicum floribus odoratis ſimplicibus*, *ſ. plenis*, *Nux juglans Virginiana nigra*, *Tulipifera arbor Virginiana*, *Viola Indica ſcandens naſturtii ſapore maxima odorata*, *Jasminum Americanum trifolium odoratiſſimum flore albo*, *Narciſſus Zeylanicus flore albo hexagono odorato* &c. Plures equidem potuiſſemus æque ratas nominare plantas, ſed brevitati ſtudentes in his acquieſcimus. Scias interim de omnibus hiſce, tam recenſitis quam omiſſis rarioribus vegetabilibus, deſcriptionem abſolutam & ut plurimum delineationem etiam inſeruiſſe Auctorem. Tabulis hinc ultra centum affabre inciſis æri hortum hunc chartaceum exornatum reperies; & quandoquidem aliquot inter eas plantas antehac minus accurata manu expreſſæ fuerint ab aliis, exquisitas magis illarum figuras hic quoque obſervabis.

**'T GEBRUIK VAN HET RECTANGULUM**  
*catholicum geometrico-aſtronomicum, &c.*

hoc eſt

Uſus



Uſus reſtanguli Catholici geometrico aſtronomico,  
Autore Henrico Caſparo Nuiſ, JCo.

Svvolllæ, apud Gerh. Tydemann, anno 1686, in 4.

**Q**uod Mathematicis circinus proportionum, aſtrolabium, ſcioterica univerſalia, quadrantibus geometricis aſtronomiceque, & ſimilia organa alia opera præſtant, id omne Autor Inſtrumento unico, in præſenti tractatu deſcripto, pollicetur, uſuque ejus tribus libris demonſtrato Lectori palam facere contendit. Inſtrumentæ delineationem, citra præceptorum adjunctionem non perinde omnibus conducturam, conſulto hic omiſimus: ejus vero exempla, ex ære affabre concinnata, Swollæ apud *Wilhelmum Bramerum* mechanicum parabili pretio venum proſtantia, Autor in præſatione operis emtoribus commendat.

Uſum porro Inſtrumenti facile conjiciet, qui organorum ſupra memoratorum rationem perſpectam habet: ut adeo præter ſumma Librorum capita nihil hic neceſſe ſit commemorare. Eſt autem liber primus totus fere geometricus, in reſolvendis problematis linearum, planorum & corporum communioris uſus occupatus: paucis praxibus intermixtis, ad architectonicam militarem, ſtaticam & geodaſiam ſpectantibus. Secundus Gnomonicus eſt, & præmiſſis ſciotericorū fundamentis & principiis, Reſtanguli uſum in inveniendis, meridiano, elevatione poli, de-et inclinationibus planorum; erigendo ſcioterici ſtylo; designandis ſuper quoque plano lineis horariis, circulis azimuthalibus, parallelis horizontis & æquatoris, domorum cœleſtium, duplici ut plurimum ratione docet, quomodoque idem etiam beneficio circini & regulæ efficiatur, oſtendit: ſciotericorum etiam ex diverſis planis aut irregularibus conſtantium, & reflexorum deſcribendorū modum breviter innuit. Adjectæ vero ſunt problematibus duorum horum librorum demonſtrationes ubiq; geometricæ. Tertius Geometrico-Aſtronomicus Triangula ſphærica reſt- et obliquangula miniſterio Reſtanguli hujus reſolvit; & præcepta hæc variis problematis primi mobilis, juxta certa data, accommodat: Horologium deinceps univerſale mobile deſcribit, ejusque uſum diſtinctis propoſitionibus explicat, & coronidis loco problemata quædam aſtronomica, & geographica peculiari ratione per circinum & regulam ſolvere docet.

LETTE-



id est

Pompeji Sarnelli Epistolæ Ecclesiasticæ.

Neapoli, impensis Antonii Bulifonis, anno 1686, in 4.

**D**uplicem epistolarum harum decadem ad Acta superioris mensis pag. 172. seqq. retulimus. Nunc de reliquis. Epistola igitur

XXI. Dissuadet Sarnellius, ne quisquam, sobolis educatione aut re familiari neglecta, orationi mentali nimium incumbat, cum ea non præcepto divino, sed consilio tantum evangelico nitatur, quatenus non tam mentis attentionem ad preces, quæ ore profertur, quam actum notet intellectus humani res divinas absque oris aut precum ministerio *contemplantis* ac *meditantis*. His enim vocibus promiscue utitur Noster, cum Molinistæ illas distinctissimas esse velint, qua de re supra p. 19. pluribus egimus. Hinc hæreseos *Messalianorum* & *Illuminatorum* illos postulat, qui istud pietatis exercitium in se bonum absolute ad salutem necessarium vocare audent. Ingenuè autem profiteatur, præcipua argumenti hujus capita hausisse se ex *opusculis de oratione Christiana*, Eminentissimi Cardinalis, Fr. Laurentii Brancati de LAUREA, cujus etiam nomini volumen hoc epistolarum inscripsit.

XXII. Autoritate c. VIII. cum beatus, dist. 45, conciliorum item *Liptensis*, *Agathensis*, *Narbonensis*, &c. pronuntiat, licere episcopo poenam flagrorum clericis, fornicationis, ebrietatis & id genus aliorum criminum reis infligere.

XXIII. SS. Maccabæos haud injuria inter Christianorum martyres reponi, inde probat, quod eorum religio non alia fuerit a Christiana, cum vitæ æternæ spem habuerint, 2. *Maccab. VII. 9. 11. 14.* & standum sit Nazianzeni dicto, *neminem eorum, qui ante Christi adventum martyrio consummati sunt, id sine fide in Christum consequi potuisse.*

XXIV. In promovendis ad dignitates ecclesiasticas non natales, sed virtutem, sed eruditionem respici cupit.

XXV. & XXVI. De Archidiaconorum & Archipresbyterorum munere agit. Observat heic ante omnia, ab Apostolis quidem septem tantum Diaconos universo Christiano orbi, ab Evaristo autem Roma-



Romano Episcopo totidem diaconos singulis civitatibus datos. Cum vero diaconorum numerus cum Christiana religione incrementa majora Indies habuisset, opus fuisse, ut boni ordinis ergo, illorum seniori titulus ac dignitas *Archidiaconi* canone 58 concilii Niceni conferretur. Hujusmodi *secundi ordinis antistitem*, (prout archidiaconum compellere amat Sidonius Apollinaris l. IV. ep. II. & 25.) de ornando templo, de litibus componendis, de bonis ecclesiæ administrandis olim sollicitum fuisse, testibus c. 57. Syn. Laodicenæ & Prudentio in hymno in divum Laurentium docet. Vertente tempore affectasse archidiaconos proximum ab Episcopo gradum, majori jure archipresbyteris competentem. Quamvis enim plus simplici vice & sigillatim anno adhuc 866, in concilio Emeritano c. 10. decretum fuerit, quod archipresbyter primum inter secundi ordinis clericos locum, alterum archidiaconus, tertium primicerius obtinere deberent; quapropter Romæ hodiernum basilicæ S. Joannis Lateranensis, S. Petri, & S. Mariæ Majoris, non archidiaconorum, sed archipresbyterorum Cardinalium imperio subsint: nihilominus episcoporum familiaritate opibusque, quas fidei suæ crediderat ecclesia, abusos prævaluisse archidiaconos, adeo ut in concilio Toletano, (quod in decretalibus citatur *cap. ut Archipresbyter, de officio Archipresbyteri,*) decreto cautum fuerit, *ut archipresbyter sciat se subesse archidiacono.* Cæterum, cum olim archidiaconi ordinandos examinassent, facile iis fuit ad Episcopi ordinantis quæstionem: *scis, illum dignum esse?* respondere: *Scio & testificor, illum dignum esse.* At, cum archidiaconi sequiorum seculorum examinis molestiam in alios dudum devolvissent, sæpe etiam nec ex aliis de profectibus ordinandi compertum quicquam haberent, hoc tamen non obstante ex veteri formula testarentur, se scire illum dignum esse; hinc, ne quis illorum conscientis scrupulus injiciatur, ex Innocentii III responso ad episcopum Auriensem Sarnellius monet, *archidiaconum de eo testari debere, quod dignus sit, quem indignum esse nesciat.*

XXVII. Præfectum scholæ cantorum ex minorum ordinum clericis collectæ, sextuplici nomine gaudere notat. Dici enim (1) *antonomastice Cantorem*, quemadmodum proximus ab eo succentor audit. 2) *Præcentorem*, quia introitum præcinat. 3) *Primicerium*. Quamvis enim hic titulus *ἐτυμολογικῶς* cuivis competat, cujus nomen in



*primis ceris* scriptum, quæ ordinis sui primus est, uti *Deipara virginum primiceria* Bernardo, Petrus *apostolorum primicerius Augustino*, Stephanus *martyrum primicerius* salutantur: stylo tamen ecclesiastico *primicerius* absque addito est cantorum præfectus, quemadmodum hoc nomine venit Gratiano *can. perlectis, dist. 27.* & Gregorio IX. *l. 1. Decretal. tit. XXV. qui est de officio primicerii.* 4) *Paraphonistam.* 5) *Protopsaltem.* 6) *Confessorem*, prout appellatur c. 9. concilii Toletani primi. *Confiteri* enim exponitur per *psallere* in hoc psalmi IX v. 2. 3. *confitebor tibi, Domine, — & psallam* nomini tuo, Altissime.

XXVIII. Ordinos ab hæreticis, schismaticis, excommunicatis aut simoniacis, illicite quidem, valide tamen ordinos esse contendit.

XXIX. Laudat, quod cilicio aut habitu monachali, signo poenitentiae, induantur moribundi & defuncti.

XXX. Linguae Latinae ignaros ab ecclesiasticis muneribus arcendos, operose inculcat.

XXXI. Agit de *baptismo solenni*, sic dicto non ob majorem ceremoniarum apparatus, sed quod certis tantum anni temporibus, & quidem a solis Episcopis detur.

XXXII. De *jeuniis*, quadragesimali sabbatico, quatuor temporum non temnenda affert.

XXXIII. Probat, sacerdotes defunctos cum habitu sacerdotali sepeliendos esse.

XXXIV. Quæritur: *an votum castitatis solenne a Religioso professore præstitum, auctoritate Pontificis relaxari possit?* Affirmandam questionem suadere videntur exempla 1.) *Ramiri*, quem ex sacerdote regem Arragoniae, maritum & successoris sui parentem factum fuisse, autor est Ancharanus consil. 329. 2.) *Constantiae* monialis Siciliarum hæredis, cui Alexander III juxta *Jurium*, aut Cælestinus III juxta *Cajetanum*, indulxit, ut Henrico Friderici Barbarossæ filio nuberet. 3.) *Nicolai Justiniani*, qui licentia ab Alexandro III impetrata, coenobio egressus uxorem duxit, genuitque filium *Laurentium Justinianum* inter sanctos relatum, narrante *Surio* tom. I. d. 8. Jan. in vita *Laurentii*, 4.) *Casimiri* monachi olim *Cluniacensis*, Poloniae hæredis, cui Benedictus IX veniam dedit matrimonium ineundi, teste *Mari. Cromero* l. 4. de rebus Polonorum. Negativam autem tnetur *Sarnellius*, quia Eccle-



Ecclesiæ non liceat facere ex religioso non-religiosum, ob *Lev. XXVII, p. 10.* itemque *c. cum ad monasterium, de statu monachorum*, ubi dicitur: *custodia castitatis adeo annexa est regule monachali, ut contra eam nec summus pontifex possit licentiam indulgere.* Exempla in contrarium adducta omnia spuria esse censet, quod uti probet, videre placet, quo eo magis historiæ ac genealogiis sua constet integritas. Exemplum enim *primum* adeo falsum esse, ut *Petrus Soto* de justitia & jure, qu. ult. art. 7. lib. 7. neget in ullo Hispanorum Chronicorum id reperiri. De eodem Marianam l. X. c. XV. dubitare. Quendam apud Sylvestrum in voce *Vorum* n. 4. dicere, Ramirum aut nunquam, aut non sponte, votum professum fuisse. *Ad secundum* cum *Odorico Raynaldo* respondet, Constantiam non monialem, sed in monasterio educatam fuisse; neque enim *Godofridum*, *Hugonem Falcandum*, *Arnoldum*, *Romualdum*, *Neubrigensem*, alios e veteribus, horrendam illam circumstantiam silentio prætermitturos fuisse. Nec Papam illi matrimonio favisse, cum *Tancredo Henrici æmulo* magis favisse eum constet. Porro, cum *Constantia* d. 27. Jan. 1186. nupsit *Henrico*, (*Godofrido* teste,) necesse esse, ut aut *Urbanus III*, aut antecessor forte ejus *Lucius III* (non *Alexander III*, aut *Cælestinus III*) hujus rei veniam dederint, (3) *Bernardum Justinianum* in vita avunculi sui *S. Laurentii Justiniani* apud *Surium* sibi met ipsi contradicere, dum asserit, *Nicolaum* Laurentii patrem dispensationem impetrasse ab *Alexandro III*, *Laurentium* vero beneficio *Eugenii IV* episcopum fuisse factum; cum tamen *Alexander III* obierit a. 1181, & *Eugenius IV* Papa fuerit creatus a. 1143; unde mira *Justinianorum* longævitas consequeretur, (4) *Votum Casimiri* quosdam a *Benedicto IX*, quosdam a *Clemente II* solutum tradere. *Baronium* a. 1041 rem narrare, sed fide *Longini*. Unde etiam constet, votum illud susceptum non sponte, sed necessitate urgente; quapropter, cum mutato regni statu, per legatos ad regnum revocaretur, *incredibili gaudio affectus fuerit*, quæ ipsius *Longini* verba sunt.

XXXV. Excerpta dat libri recens scripti, & quantum constat, hæcenus inediti, de anno *nativitatis Christi*. Videtur digna esse nobilissima hæc controversia, de qua pluribus Autorem illum anonymum *Sarnellio* interprete differentem audiamus. Præmissis variorum sententiis dicit, Christum natum esse *sub finem anni Juliani XLI*, anno ante æram vulgarem V, Augusti XL ex quo exercitui præfuit, at



*XXVI post fata Cleopatrae; Herodis XXXIV ex quo Antigonus mortuus, et XXXVII ex quo Regnum ipsi concessum fuerat. A. V. C. 749; anno quarto Olympiadis 193. A cataclysmo universali 2344. ab orbe condito 4000. Periodi Juliana 4709. ab initio hebdomadum Danieliticarum 450. Augusto Cæs. XI. aut XII. & L. Corn. Sulla II. Coss. Propositio-*  
*nem hanc suam probat eo, quod nativitas Christi integri fere anni intervallo præcesserit Herodis mortem. At hanc contigisse anno Juliano XLII. Ergo illam anno XLI. Prius nititur hypothese e veteri traditione desumpta, Christum natum esse d. 25. Decembris. At inde usque ad finem anni supererant quinque modo dies, quorum spatio adventum magorum & Janienam Bethlehemiticam includere absurdum est; unde consequitur, Christum alio anno natum, alio Herodem denatum fuisse, cumque hic obierit septimo mensis Casleu, sive die 25. Novembris, (quapropter Judæis illum sacrum esse, Usserius ex Liveleo, & Liveleus ex Megillath Taanith notarat,) oportet ad minimum undecim mensibus, seu Decembri anni Jul. XLI ante mortem Herodis genitum esse Jesum. Neque enim Christi nativitatem ab obitu Herodis distare longius putat, forte, quia antequam Christus ex Ægypto revocaretur, Herodem jamjam ad plures abiisse, ex Matth. II. 19. liquet. Posterius seu quod Herodes A. J. XLII. obierit, hisce probat rationibus. 1) Obiit is, juxta Josephum Ant. Jud. XVII. 10. anno 37, ex quo rex a Romanis creatus, anno autem 34, ex quo Antigonum regno & vita exuisset. Atqui illud Octobri anni Jul. VI, hoc anno Jul. IX factum esse, idem Josephus author est. Incidit hinc in Novembrem Anni Juliani XLII annus ultimus incompletus Herodis, h. e. 37 a regni auspiciis, & 34 a morte Antigoni; quemadmodum 36 regni, & trigessimus quartus a morte Antigoni, Octobri ejusdem Anni Jul. XLII. terminatus fuerat. Urget (2) anno emortuali Herodis, Lunam eclipsin passam esse dirissimam ac Hierosolymis conspicuam. Tale quid autem contigisse A. Jul. 42. circa pascha, 13. Mart. hora 3. ante solis ortum. Ergo anno 42 Herodem obiisse. Nam eclipses annorum 43. & 44, aut non veras aut non conspicuas fuisse. Multo minus huc pertinere eclipsin anni Jul. 45; incidit quippe ea 10. Jan. in noctem, quæ Sabbatum auspicabatur; at ea non licuisset capitis sententiam ferre in Judæos, quibus, ne Sabbato in jus vocarentur, indulserant Romani. Atqui Josephus l. XVII. A. J. c. 8. Caterum (inquit)*



*Herodes, post multatum Matthiam sacerdotio, alterum Matthiam seditionis auctorem ejusque socios vivos exussit, in quam noctem etiam defectus Luna incidit.* (3) Archelaus, Herodis filius & successor, deportatus est Viennam, regiminis sui anno X. ineunte. *Josephus l. 2. de B. I. c. 6. & l. 7. A. J. c. 15.* Atqui, *Dione teste l. 55.* contigit id M. Æmil. Lepido, L. Aruntio Coss. h. e. A. Jul. 51. Subtractis ergo annis 9. completis ab annis 51 Julianis, remanent 42. (4) Quirinus eodem tempore Archelai facultates fisco addixit, quo censum egit. At census actus (juxta *Joseph. l. XVIII. Ant. c. 3.*) anno 37. post victoriam Actiacam, obtentam C. Cæsare III. Messala Corvino Coss. die 2. Sept. h. e. Anno Jul. XV. Addantur jam 15 ad 37. Summa erit 52, qui annus coincidit cum Archelai decimo ineunte. Sublatis vero 10 a 52, remanebit annus 42, quo per Herodis mortem ad Archelaum tetrarchia devenit. Hæ fere rationes sunt, quibus sententiam suam Anonymus ille roboravit. Quam feliciter, Lector judicet. Hypotheses enim, *Christum natum die 25. Dec. & Herodem denatum die 25. Novembris*, Eruditis non paucis ulteriori probatione egere visæ sunt, e quibus laudasse sufficiat summum, dum viveret, Philologum, *Christianum Noldium*, cujus Historiam Idumæam seu de vita & gestis Herodum Diatriben Franequeræ 1660. editam, cum dictis contulisse, Lectorem non pœnitebit. Subjungit dehinc Sarnellius objectiones cum responsionibus Chronologi sui, quas huc transcribere prolixum nimis foret. Epistola

XXXVI Probat, convenire Canonico, ut clericos grammaticam edoceat.

XXXVII Imagines sacras, præcipue Christi, Deiparæ, Petri & Pauli qua ratione depictas cupiat, edisserit. Solide dehinc, epistola

XXXVIII liberationem animæ Trajani, ex inferno per preces S. Gregorii impetratam, fabulam esse evincit,

XXXIX. Ecclesiam Latinam & Græcam in doctrina de Sacramentis ordinis, pœnitentiæ & matrimonii, horumque tum materia, tum forma non adeo a se invicem dissidere statuit, ac videntur. Denique Epistola

XL catalogum duplicem texit. *Primum Romanorum Pontificum ac Cardinalium ordinis Prædicatorum*, quorum primus est *Hugo de S. Caro*, creatus 1244. mortuus 1264. Ultimus seu quinquagesimus tertius est *Raimundus Capisucchius*, creatus Kal. Sept. 1681. *Alterum,*



rum Pontificum & Cardinalium familiæ illustrissimæ *Ursinorum*, quorum omnium primi sunt *Stephanus III* & *Paulus III*, fratres germani, ambo Cardinales, ambo Pontifices. Mortuus ille 26 Apr. 757: hic 29 Jun. 767. Ultimus sive *trigesimus primus* est Fr. *Vincentius Maria Ursinus*, Cardinalis creatus 22. Febr. 1672.

Perduximus hoc modo ad finem Excerpta Voluminis hujus, quod quum *prodromum* tantum cæterarum suarum epistolarum doctissimus Autor vocarit, non possumus non voluminum nondum editorum duci desiderio, æque ac *Antiquæ Basilicographiæ*, quam ad prælum paratam habet. Neque enim minorem gloriam inde sperare poterit, clarissimus Vir, ac ex iis, quæ hactenus edidit. Edidit autem, quantum novimus, primo *Speculum Cleri secularis*, sive vitæ SS. Clericorum Secularium, opus tripartitum, cujus *parte prima* continentur vitæ SS. Clericorum primæ tonsuræ, Ostiariorum, Lectorum, Exorcistarum, Acolythorum, Subdiaconorum & Diaconorum; *parte secunda* vitæ Sacerdotum; *parte tertia* elogia Presbyterorum vitæ sanctimonia illustrium: impressum illud est Neapoli apud Ant. Bolifonem 1678. 1679. in 4.to. Conferri de eo poterit *Diarium Eruditorum Romanum*, 1668. p. 98. & 1679. p. 57. Edidit porro *Chronologiam Episcoporum & Archi-Episcoporum Sipontinorum*, Manfredoniæ 1680. Edidit denique, quos Epistola XIV. allegat, *Commentarios in ritum S. Missæ*, & si quæ forte sunt alia. Sed hæc omnia potiore civium suorum ratione habita, Italico sermone conscripsit, quæ si Latine extarent, majori usui forent universis Reipublicæ literariæ civibus.

### ANTIQUITATES APOSTOLICÆ, OR,

*the History of the holy Apostles, and the two*

*Evangelists SS. Mark and Luke, by William*

*Cave &c.*

- seu,

Historia Sanctorum Apostolorum, duorumque insuper Evangelistarum Marci & Lucæ, per Wilh. Cave, Th. D. & Capellanum Regis Ordinarium.

Editio Quinta.

Londini, apud R. Royston, 1684, in fol.



**A**liquoties quidem jam materiam nobis suppeditavit præclarissimus hic Autor, commemoratis doctissimis ejus scriptis insignem ipsius in historia præsertim ecclesiastica cognitionem atque dexteritatem deprædicandi, speciatim in *Actis anni 1685. pag. 85. & 117. & anni 1686. pag. 165. & 177*: non possumus tamen quin de novo nunc in scenam ipsum producamus, postquam elegantissimi hujus, quod exhibemus, scripti non ita pridem nobis copia obtigit. Tametsi vero id serius non nihil ad nos delatum doleamus, nec diffiteri queamus, quanta jam vice recusum, adeoque haud novum esse: nihilominus tantum abest, ut ex ejus recensione nauseam lectori suborituram metuamus; ut potius multorum adhuc gratiam hoc ipso promerituros nos speremus, ad quos forte libri, Anglico quippe idiomate conscripti, noticia penetrare hactenus non valuit. Est autem ille, teste rubrica, Continuatio alius cujusdam scripti, quo sub titulo *Antiquitatum Christianarum* historiam Vitæ ac Mortis sanctissimi Salvatoris *Jer. Taylor* pertractaverat: quemadmodum vicissim majus illud *de Patribus primitivæ Ecclesiæ* opus, in *Actis Mensis Feb. 1685. p. 85.* memoratum, tertiumque superiori anno in *Anglia, ut accepimus, recusum, præsentis hujus Apostolicæ Historiæ Continuationem esse Cavius* voluit. Protestatur in præfatione se coactum quasi & importunis amicorum precibus sollicitatum potius, quam spontaneo motu operi huic semet accinxisse, eo quod hac ratione *Ægyptio* velut labori, lateres sine stramine parandi, sese subditum fore prævideret, ob autorum nempe defectum ac deplorandum istud plerarumque Ecclesiæ antiquitatum, quod dudum passus sumus, naufragium. Fatetur quidem, libro materiam haud fuisse defuturam, si promiscue scriptores quoscunque, frivolos etiam & fabularum plenos, nominatim *Abdiam Babylonium, Passiones Petri & Pauli, Joachimum Perionium, Petrum de Natalibus* & similes in consilium adhibere voluisset; at cum piæ istorum fraudes, nimis plerumque nugis adornatæ ipsi minime arriserint; optat, ut potius antiqua *Hegesippi Commentaria, Clementis Alexandrini Institutiones, Africani Chronographia* aliaque hujusmodi melioris notæ scripta superessent, plenius quippe satisfactura lectori curioso & harum rerum avido; cujus appetitum quidem ab iis, quæ de temporum istorum historia manserunt reliqua, incendi, famem tamen nequiquam sedari posse lubens agnoscit. Cæterum nec diffitetur, Autores in concinnandis hisce gestis a se con-



sultos uti non unius generis, ita nec ejusdem autoritatis aut fidei esse: utur enim magna materiæ pars scriptoribus Θεοπνευστῶν debeatur, hausta quippe cum ex quatuor evangeliiis, tum ex actis apostolorum a Luca consignatis; (unde & priorum duorum, Petri nempe & Pauli historia, ut in sacris uberius exhibita, vitas reliquorum longe excedit mole) nihilominus ob horum parvitatem necessum sibi fuisse ait ad Patrum quoque scripta recurrere, tam genuina, quam putatitia, quibus nec ipsis tamen in hisce facti saltem materiis omnem derogari posse fidem autumat. Denique nec superfedere se omnino potuisse fatetur scriptis mediorem & recentiorum seculorum, quæ fabulas quidem alicubi intermiscere, plures tamen insimul solidiores ac vero haud ab-similes narrationes continere visa sint; quorsum refert *Symeonem Paraphrasten*, *Nicephorum Callistum*, *Menaem* item & *Menologia* Ecclesiæ Græcæ. Ad præparandum vero melius operis ipsius tractationem, Discursum præmittit Introductorium, de tribus illis majoribus Ecclesiæ Dispensationibus, Patriarchali nempe, Mosaica & Evangelica, ubi in brevi velut schemate statum rerum in præcedentibus Ecclesiæ periodis accurate depingere satagit, ut apparet, quibus gradibus status Evangelicus fuerit introductus, & quam Deus in qualibet ætate methodo usus fuerit in monstranda hominibus via pietatis atque virtutis. Nimirum non historicum hoc in libro nude agit Autor, sed ubivis data occasione pia etiam dogmata & regulas sanctioris vitæ sedulo inculcat, lectoremque adeo suum non doctiorem solum, sed & probiorem dimittere allaborat: quemadmodum etiam in vitis singulorum apostolorum, quorum epistolas reliquas habemus, non omisit loca horum difficiliora simul tangere, eorūque obscuritatem diluere: uti speciatim plurima Pauli *δυσνόητα*, præcipue circa articulum justificationis, ex primæ istius ecclesiæ facie & statu controversiarum tunc temporis maxime vigentium, perquam commode deducit ac explicat.

Porro de ipsis libri contentis, quorum quidem plurima haud alibi passim habebis obvia, multa hic verba facere non erit opus, maxime cum liber non nunc primum prodeat: speciminis tamen loco unum alterumq; quod cursoria nobis lectio obtulit, allegasse haud pigebit. Ac ex Discursus quidem Introductorii tripartiti *primo capite*, ubi de Dispensatione Patriarchali sermo est, inter alia notamus, Autorem in ea esse opinione, quod sabbathum non mox a tempore creationis, sed  
 ex lege



ex lege demum per Moſen lata ſua habuerit incunabula, cum fatentibus id antiquioribus Judæis & Patrum plurimis, per univerſa Patriarcharum tempora ne minimum quidem ejus extet veſtigium. Id enim quod *Gen. 2. v. 3.* habetur, aut per prolepfim quandam a Moſe dictum eſſe exiſtimat, ſiquidem id ad ſabbathum aliquod hebdomadarium referri debeat; aut, quod verius & textui æque ac praxi iſtius ævi magis accommodum putat, nullo plane ad id reſpectu habito, id ſaltem inferre, quod Deus benedixerit ac ſanctificaverit illam ſaltem diem ſeptimam, eo quod tunc omnia ſua opera in creatione hominis compleviſſet, utpote in quo, tanquã in coronide creationis magnifica, ipſe ſe ſuo modo ſanctificare intenderit, *pag. 10.* Circa finem *ſecundi capituli* Oeconomiam Moſaicam exhibentis, ubi de variis Judæorum traditionibus diſcurrendi occaſio eſt, præſertim Phariſæorum (in quorum ſectæ incunabulis definiendis inſignem a Chronologis Judaicis antichroniſmum committi notat, dum ſtatuant, eam cœpiſſe temporibus Tiberii Cæſaris & Ptolemæi Philadelphi, quaſi hi ſynchroni fuiſſent, qui 260 ad minimum annis diſtent, *pag. 53.*) inter alia tractat de inofficioſo iſto voto *Corban*, cujus mentio fit *Marc. 7. v. 11.* idque non, ut vulgo creditur, in eo conſtituiſſe ait, quod quis univerſa ſua bona ſacris uſibus ac Deo conſecraſſet: ſed innui ibidem certam votorum ſpeciem, cujus veſtigia in Rabbīnorum ſcriptis frequentiſſima extent, quamque אִסֵּר נֶדֶר ſeu *votum interdicti* appellaverint, qua mediante ſe intuitu ſolum certarum perſonarum & rerum adſtringere fuerint ſoliti, v. g. quod hoc vel illud officii genus ab hoc vel illo amico recipere nullo modo poſthac vellent, quod hanc vel illam rem huic vel illi homini uſpīam commodare, aut ejus uſibus concedere nollent; quali voto ſemel emiſſo, utut ex inconfiderato impetu, æque nefas reputarint illi contravenire, ac ſi *corban* ſeu rem ſolemniter Deo dedicataam attigiſſent: tale itaque votum interdicti, importuna parentum inopum mendicatione forte a tenaci & ingrato filio elicitum, in iſto textu intelligendum eſſe contendit, *pag. 51.* In *tertio capite* ſeu tractatione de Evangelica diſpenſatione, quando de Baptiſmo agit, probat etiam in veteri teſtamento baptiſmi frequentiſſimum uſum fuiſſe, præſertim in adoptione proſelytorum; dum in maſculi quidem converſione tria, circumciſio nempe, baptiſmus & ſacrificium eucharifticum, in ſœminæ vero duo, baptiſmus & oblatio fuerint requiſita: imo quod Rab-



bini annotent, ubicunque vestium lotio imperata legatur, ibidem baptismum injectum reputari, *pag. 60.* Hæc ex discursu præliminari. Jam ut de ipsius etiam libri argumentis quædam allegemus, Auctor in ipsa quidem vitæ *Petri*, quæ agmen ducit, descriptione fatetur, multa esse, quæ quæstionem, an Petrus unquam Romæ fuerit, dubiam reddant, quamvis ipse nihilominus in affirmativam inclinet: at in subjuncta appendice (quæ nunc noviter accessisse videtur; quemadmodum & in aliis partibus hæc editio prioribus auctior laudatur,) plenius deducit, ob plurima antiquorum testimonia commode non posse negari, quod Apostolus hic Romam venerit, quamvis paucis ante mortem ejus annis id factum putet: & cum hac in re contrarium repererit *Frid. Spanhemium*, in peculiari dissertatione *de temere credita Petri in urbem Romam profectio*, anno 1679 Lugduni Batavorum edita, pluribus ostendit, ejus contradictionem non frustraneam solum & periculosam, ob labefactatam tot antiquorum fidem, sed & inutilem esse, dum ex quæstionis hujus concessione debite restricta nil quicquam causæ Pontificiorum accedat, *pag. 59. seqq.* In vita porro *Pauli*, ubi de ara Dei incogniti Athenis reperta sermo est, integram illius inscriptionem ex *Oecumenio* hanc fuisse allegat: ΘΕΟΙΣ ΑΣΙΑΣ ΚΑΙ ΕΥΡΩΠΗΣ ΚΑΙ ΛΙΒΥΗΣ ΘΕΩ, ΑΓΝΩΣΤΩ, ΚΑΙ ΞΕΝΩ. Ut alia quæ hanc in rem affert, taceamus. Vid. *pag. 81. seq.* In historia *Johannis* ex *Bellonio* narrat, in insula *Pathmo* a Græcis monachis hodiernum ostendi manum hominis cujusdam mortui, a qua resecti ungues continuo recrescere soleant, quam quidem Turcæ unius ex ipsorum Prophetis fuisse contendunt, Monachi tamen illi perhibeant ipsius *Johannis* manum esse, qua apocalypsin ibi locorum consignaverit, *pag. 157.* In vita *Matthæi*, ex publicano apostoli, ostendit istud officii genus apud Judæos quidem summe exosum fuisse, in tantum ut pro peccato non habuerint, telonio præfectum adhibito etiam perjurio circumvenire: at e diverso apud Romanos sat honorificum habitum esse, & vix aliis nisi equestris dignitatis hominibus conceditum: quinimo refert, *T. Fl. Sabino*, *Vespasiani Cæsaris* patri, teloniis provinciarum Asiaticarum præposito, statuas in honorem erectas fuisse, cum inscriptione ΚΑΛΩΣ ΤΕΛΩΝΗΣΑΝΤΙ, *pag. 180.* Quoad *Bartholomæum* observat, præter nudum nomen nil quicquam de eo in historia Evangelica referri, indeque cum quibusdam conjicit, ipsum sub alio adhuc nomine ibidem latere, idque



idque probabiliter non aliud, quam Nathanaelis esse auguratur. Allegat certe hujus opiniois rationes haudquaquam temnendas, primo quod Johannes nusquam Bartholomæi, reliqui evangelistæ nullibi Nathanaelis mentionem faciunt; deinde quod uti a Johanne Philippus Nathanaeli ratione accessus ad Christum & primæ vocationis jungitur, ita apud reliquos tres in recensione duodecim apostolorum Philippus Bartholomæo constanter ad latus ponitur; ulterius quod in apparitione Christi resuscitati prope lacum Tiberiadis, Nathanael expressis verbis in medio aliorum apostolorum recensetur; denique quod nulla appareat causa, quare in supplendo per sortem Judæ proditoris loco Nathanael, toties tamen cum Salvatore conversatus, non inter candidatos simul recensitus fuerit, nisi jam tum antea in apostolorum collegio locum habuisset. Nathanaelis ergo nomen proprium ipsi fuisse autumat, alterum vero Bartholomæi aut patronymicum fuisse (more isti genti perquam familiari, uti Petrus etiam Bar-jona, Joseph Bar-sabas, Josès Bar-nabas vocatur) aut sectæ cujusdam, cui antea additus fuerit, appellationem: Tholmæanorum enim ordinem inter sectas illius ævi haud ultimum locum obtinuisse probat, ut hac ratione Bar-tholmæi idem significarit ac filius seu discipulus Tholmæanorum, pag. 174. Plura hujusmodi excerpere non erit opus, cum ex his, quæ hæcenus allata sunt, abunde de reliquis judicium sumi valeat. De cætero in rubrica jam indicatum est, apostolorum historiæ vitas etiam duorum evangelistarum subjungi, Marci nempe & Lucæ: reliquos enim duos ex ipsorum duodecim apostolorum numero fuisse, nemo ignorat. Denique in fine superpondii loco subnectit Autor Diptycha Apostolica, ut vocat, hoc est succinctam enumerationem & seriem episcoporum, qui per priora tria secula præfuerunt aut præfuisse certe feruntur Ecclesiis Apostolicis, puta Antiochenæ, Romanæ, Hierosolymitanæ, Byzantinæ & Antiochenæ: ad perfectionem enim pleniorum historiæ apostolorum utique pertinere existimavit, scire quosnam hi in ecclesiis a se plantatis immediatæ ac proxime successores habuerint.

ADAMI ADAMANDI KOCHANSKI E  
Soc. JESU, Sereniss. Polonia Regis Mathematici,  
MENSURÆ Universales Magnitudinum ac Temporum,  
Ad Actorum Erud. Collectores.



**P**ostelapsi anni 1686 Mense Decembri, transmiseram Parisios meas aliquot Observationes ad Amicū quendam, rogatum impense, ut eas ipsemet Ephemeridum Gallicarum Collectori in manus traderet: sed cum trimestri jam elapso nihil comperti habeam, utrum eo pervenerint, visum mihi est e re literaria futurum, si eas, prout a me tunc conscriptæ fuerant, ab interitū vindicarem: Omīssa itaque conjectura illa mea de Motu Diurno Telluris, e terræ motu petita, quæ Actis Erud. Lipsiensibus Mense Julio Anni 1685 inserta est, & quam in Gallia, succussionibus ejusmodi magis, quam nostræ regiones obnoxia, notam reddere, & observatores exstimulare cupiebam, reliqua eo tunc transmissa, verbis iisdem, fideliter & integre exscribam, ut sequitur:

*Clariss. & Eruditiss. Viro Ephemeridum Gallic. Collectori &c.*

Non aliud paucis his, quæ Tibi nunc, Cl. Vir, adfero, prætexam patrociniū præfationemque, quam nos æque natura sciendi cupidos, ac ad ea, quæ scimus aliis enarranda proclives esse. Eo quoque invitant Tua, aliorumque in promovendis scientiis exempla. Quod si non omnes ad exstruenda scientiarum palatia, marmor aut gemmas adferimus, etiā sabulum, paleæque leves cæmento hujus ædificiū non erunt, opinor, inutiles.

### I. Nova mensura universalis Temporum.

Quærit hucusque Geometria certam quandam, ac invariabilem Corporum Linearumque mensuram; quæ quidem, opinione mea, in ipsius magnitudinis continuæ natura delitescit, sed non prius eruenda, quam cognita sit, & ad aliquam mensuram revocata quantitas Angulorum Mixtilineorum, quales sunt semicirculorum, segmentorumque: At quia id vicissim certam lineæ rectæ, arcus eos subtendentis, quantitatem præsupponit, nec fortassis alia via indagari potest, difficultas hæc abit in circulum nullo humano ingenio explicabilem: Quocirca Problemati huic solvendo adhibita fuit a nonnullis mensura Temporis a Pendulo petita, cujus vibrationes minuta secunda primi Mobilis, vel horum partes aliquotas adæquant. Et verò improbari minime debet Inventum istud, si debitis cum cautelis in eo procedatur, ac præsertim ut nobis certo constet, Pendula nec ab Atmosphæræ in diversis climatibus varietate, nec a varia centri terræ distantia sensibilibiter alterari; quod an quisquam exploraverit, ignoro; quia tamen

ejusmo-



ejusmodi penduli inventio hominibus occupatis admodum operosa videtur: nam plurium vicariam opem postulat, unico tentamine non obtinetur, nubibus eluditur &c. Idcirco innuam aliud fortasse commodius, cujus ope motus omnes etiam Cælestes mensurari, ac prædictorum Pendulorum vera quantitas facilius determinari poterit. Observavi ab annis compluribus, candelas usitate cujusvis crassitiei, ardentibus in aere libero ac tranquillo, scintillationes, sive subsultationes illas suas ab aere undulatum accurrente ortas, vibrationibus ad sensum æquidivertentibus peragere. Inveniatur ergo Pendulum, cujus una vibratio quaternis, aut senis ejusmodi palpitationibus sit æqualis, atque hujus Penduli longitudo simpla vel dupla cum motu diurno fixarum, nec non solis medio, conferatur: sic enim habebimus mensuram notam à Cælo, sed ex Elemento ignis nostri sublunaris deductam; quam tamen & ab aliis elementis aliter obtinebimus.

## II. Nova mensura universalis Magnitudinum.

Præter aliam indicatam, est & alia quædam non inelegans hujus indagandæ ratio, ab elemento Aquæ deducta, diversa tamen ab ea, quam T. Livius Burattini, amicus quondam meus, secutus est in suo hac de re tractatu, Italice in Lituania edito: sed quia meam hanc Observationem paucis hic explicare non possum, alteri tempore locoque reservare cogor. Nostræ igitur Arti Geometriæ Practicæ, a naturis Aereis mensuras mutuabimur hoc modo. Prætermisissis itaque omnium vegetabilium seminibus, pilis animalium, fibris corporum Microscopio detectis &c. ego spem omnem collocavi in Volucris. Aptissimas huic negotio crederè pennas ex alis passeris domestici ruralis; supposito tamen quod hæc species avicularum etiam in extremo Oriente, nec non America reperiatur, & quidem ejusdem stature cum nostratibus. Refert O. Dappers in sua Africa Germanice edita, passerem ad caput Bonæ Spei reperiri; sed earum pennæ cum nostratibus essent conferendæ. Praxis ad rem præsentem ita esset instituenda. Ex alterutra ala passeris masculi & senis, sumatur certa quædam penna, v. g. tertia & quarta, & ea primum artificio facili in directum extendatur: tum in medio cauliculi, plumulis transversis convestiti, capiatur certus quidam numerus intervallorum, quibus transversæ plumulæ ab invicem distant istæ enim divisiones inservient nobis per modum scalæ cujusdam arti-



facialis, juxta quam taxari poterunt partes aliquotæ pollicum, aut palmorum pedis Geometrici, ac etiam aliarum Urbium, ac posteritati scripto commendari; non enim mihi credibile videtur, passerulorum nostrorum proceritatem seculis immutandam. Cautelas in operando necessarias non enumero, quia perspicacibus loquor. Si quis autem subtiliore, & exactiore scala uti volet, hanc inveniet in iisdem passerum pennis; nam & ipsæmet transversæ plumulæ subdivisæ sunt aliis transversis plumulis, quæ judice rudiore Microscopio, magis æqualibus ab invicem distant intervallis. *Inquirant igitur curiosi*, quibus aut maria trajicere, aut a regionum peritis id intelligere commodum fuerit, utrum passeret & hirundines, aut aliæ aves communes ubique terrarum, & quidem (quod caput rei est) ejusdem cum nostris staturæ reperiantur. Plumulas transversas struthionis, pavonis, ciconiæ &c. relinquendas censeo, quod non sint adeo obviæ, quales esse præstat. Habeo complures alas passerum e diversis Europæ partibus, quæ primo aspectu æquales esse videntur, sed eas per otium diligentius adinvicem conferam. *Pondus universale* tunc primum adferam, cum explicuero artificium illud aquam tractandi initio commemoratum. Id interim silentio minime præteribo, pro pondere universali rudioris minervæ, sumi posse aureos Hungaricos, quos & Ducatos appellamus; hi enim per totum orbem sparsi sunt, & quidem ponderis delectu prius instituto, non admodum inæqualis. His igitur utcumque taxari poterunt libræ (pondo) diversarum urbium, etiam in Asia, ubi Anglica Marcarum ponduscula ad manum haberi non possunt.

### III. Mensurarum facilis ad posteros, vel absentes transmissio

Non absre fortassis erit hoc loco commemorare, deceptum fuisse W. Snellium, & aliquos cum eo Authores, qui crediderunt mensuras pedum chartæ madidæ impressas, certa quadam proportione post ejus siccationem contrahi. Certum enim est, chartæ longitudinem magis huic contracturæ subesse, quam latitudinem. *Longitudinem* autem illam voco, juxta quam porriguntur in longum vestigia filorum æneorum, e quibus cribrum aut forma papyri contexta est. *Latitudo chartæ ea est*, quæ prædicta filamenta transversim connectit geminis filis, hinc & inde ad intervallum pollicis circiter. Occasione porro pedis Romani antiqui, a Villalpando in Apparatu Templi chartæ impressa



impressi, & genuino pedi plerumque congruentis, exploravi diversas in Europa chartas, & inter eas, illam ipsam Hispanicam Villalpandi, quæ inter omnes minimam passa est a siccatione contracturam secundum latitudinem, in quam Pes ille porrigitur: fortassis autem id accidit ex eo, quod ipsa quidem tenuis sit, licet cribro crassioribus filis contexto formata fuerit; nam in alia quadam ejusdem sortis, ac non nihil crassiore, inveni torum Pedem una centesima breviorē eo, quem Romæ a Grunbergero nostro, Villalpandi, in calculandis Apparatus Tabulis, adjutore, lapidi subtiliter incisum, exactissime dimensus sum, & in ænea lamina designatum adhuc possideo. Hic tamē alter Pes impressus crassiori chartæ, nec dum compactoris malleum subierat, quem postea passus, defectum illum liberaliter compensavit.

Experimentum illius rei sic institui: e qualibet chartarum infra positarum, sumpsi duas fascias latas 130 Centesimis unius uncie pedis Rhenani, longas autem Semipede Rhen. quarum fasciarum una erat refecta juxta longitudinem, altera secundum latitudinem chartæ. Hæ fasciæ aqua fluviali madefactæ creverunt juxta números adjectos, qui sunt centesimæ partes unius uncie Pedis Rhinlandici.

*Sequentes Chartæ madefactæ creverunt In Longum | In Latū.*


Romana di Fuligno candida & solida	- - - - -	10	=	7.
Hispanica Villalpandi in figura Congii Rom.	- - - - -	10	=	5.
Eadem non nihil crassior, de qua superius sermo	- - - - -	10	=	7.
Florentina epistolaris, quales & septem consequentes	=	13	=	8.
Genuensis cum tridentis insigni	- - - - -	16	=	9.
Italica quædam tenuissima, cum hasta	- - - - -	17	=	10.
Gallica cum Cornu Tabellionis	- - - - -	10	=	9.
Hollandica præcedentem mentita	- - - - -	11	=	8.
Joachimicæ Vallis in Bohemia, candida tenuis, ac compacta		20	=	13.
Comotoviensis in Bohem. probe aluminata, tenuis tamen		14	=	10.
Uratislavien. in Silesia, tenuis, ac compacta	- - - - -	13	=	10.
Regalis crassa Bohemica	- - - - -	14	=	9.
Dantiscana crassa cum Carpionis insigni	- - - - -	9	=	7.
Italica Regalis vetusta, ac solide compacta	- - - - -	10	=	9.
Alia crassis filamentis contexta, & mediocriter crassa	-	13	=	9½

Observavi præterea, lineas ac figuras laminis æneis incisas, & usitato



sitato prelo Cylindrico in charta expressas, magis ea parte contrahi, quæ Cylindrorum violenta pressione charta fuerat in longum distenta, quod non ita contingit in transversum; unde fit, ut circuli præsertim majusculi, laminæ diligenter incisi, & memorato prelo expressi, charta siccata reddantur altera parte contractiores. Sed neq; Ricciolus noster in sua Geogra. Reform. errandi periculum omne sustulit, semipedem Romanū chartæ siccatae imprimi curando; nam hæc ipsa ad aeris alterationes nonnihil mutatur, & tractu temporis non secus ac tabularū lignearum, quin & eboris latitudo, minuitur. Securior itaque modus esset hujusmodi mensuras particulares ad posteros transmittendi, incidendo illas formæ metallicæ, ac tum imprimendo bracteolis illis æris coronarii, quæ ab Italis *Orpello*, a Germanis *Krauschgold* appellantur. Hæ enim non incommode libris a compactore inseri poterunt. Alteratio illa modica, quam subeunt a calore vel frigore, sensibilem in semipedes non inducet errorem. Si quis tamen e foliis impressis genuinas consequi volet mensuras, eas a charta prius humectata, & convenienter extensa, sat exactas poterit impetrare.

Per Epistolam vero commodissime mitti poterit Amico absentis, mensurâ semipedis, vel ejus quadrantis, in chorta tenui ænea, quales in Musicis instrumentis adhibentur; In ejus enim extremis ad intra reflexis sunt per contorsionem chordæ duo laquei A & B, partes vero contortæ malleo nonnihil tundantur, ut firmiter cohæreant: tandem extento supra datam mensuram mediocriter filo æneo, ejus extremitates internæ, forficula, vel cultello, accurata manu quantum opus est, reciduntur. Inspice adjectam Figuram.



#### IV. Penduli portatilis, ac Horologiorum perfectio.

Vibrationes ejusdem penduli in arcibus inæqualibus inæquales esse, a multo tempore experientia oculis ipsis manifesta didici. Hanc quidem inæqualitatem Cycloidis adminiculo sublata esse non ignoro, videtur interim mihi Cycloidis usus cum pendulo e fascia appenso, in usus nauticos, ad longitudes Terræ investigandas, ob navis agitationem, nonnihil impeditus esse. Quamobrem construxi horologium, cujus



rotæ ad numeros Altronicos decurrunt, in eoque duo pendula æqualia appensa sunt ex elateribus chalybeis, mediocriter latis, at facile flexibilibus, & breviusculis quidem, sed qui pro re nata produci nonnihil, vel contrahi possunt, reliquæ pendulorum virgæ sunt rigidæ. Exuperior autem elateres hos ad instar cycloidis, digressiones & in iis moras pendulis non permittere, sed æquales ad sensum vibrationes peragere: quæ quidem in horologio meo breves sunt. Nam binæ compositæ sive quaternæ simplices uni secundo respondent: verum & in longioribus pendulis e convenienti elatere pendentibus, de felici successu dubitare non licet. *Experiantur itaque navigantes*, annon pendulum elatere hujusmodi sustentatum, altero illo suspenso e fascia cycloidem stringente, sit in mari commodius.

Horologiis rotatis in sacco portatilibus applicueram olim pendulum Magneticum, quod frusto validi magnetis ad vibrationes incitabatur satis æquales; sed quia pondus lapidis gravat, & ferri vicinia æqualitatem vibrationum perturbat, ideo repudiato hoc invento, id tandem effeci, ut horologia parva nunc usitata, quæ librile habent elatere spirali instructū, nulla inter ambulandū vel equitandum agitatione turbentur in suo motu regulari. Appendo enim totum horologii corpus intra suam thecam extimam nonnihil ampliorem, ita ut circa systematis totius axem, librili axi parallelum, vel circa duos potius ejus polos, aut cuspides, instar Rosæ nauticæ, libere convertatur horologium totum: quo fit, ut nulla agitatio horologii sic appensi ejus librile in suo cursu perturbet, quemadmodum fit in usitatis, quæ manu velociter reciproceque agitata, vibrationes librilis enormiter præcipitant: Id ipsum autem etiam in accelerata deambulatione, quando videlicet sacciperium pendens, una cum horologio in eo contento, reciproce agitur, contingere solet, & incautos decipere. Praxis appensionis illius varie poterit institui. Ego hanc tenui. Thecam extimam ansa & annulo appensorio, nec non crystallo instruxi: in fundo thecæ defixi brevem stylum, qui pileolum in pixide horologii firmatum sustentat: alter polus est ille ipse, qui indicem horologum defert, & in altero pileolo crystallo centrum occupante, circumagitur.

Non ingratum fortasse Curiosis erit hac occasione intelligere, me excogitasse ab annis aliquot artificium quoddam, quo mediante, quilibet rudis homo, puer aut scœmina, quin & cæcus incidere poterit



quascunque minutas horologiorum rotas, tot dentium quot imperantur, absque prævia earum divisione, & insuper eadem opera plures, æquales, majores, & minores. Præterea aliud artificium ad formandam Torno cochleam illam Horologii, quæ chordam, vel catenulam colligit, dando illi figuram, attemperandis viribus cujuscunque dati elateris chalybei convenientem; ita ut cochlea circuitus imperatos complectatur. An autem ista publicari debeant, ne in eorum artificum, qui veteribus insistere coguntur, detrimentum cedant, anceps hæreo.

Ausim etiam Opticis polliceri Tornum universale, in quo lentes, & specula omnium sectionum Conicarum, elaborari possunt; & quidem ratione modoque inter omnes alios commodissimo: reddidi enim illud immune eo defectu, quo omnes aliorum machinæ tales laborant; ne videlicet inter laborandum, propositæ figuræ modulus deteratur.

Hucusque ea, quæ a me in Galliam missa fuerant, e quibus illud posterius Num. IV de Horologiis in sacco portatilibus, quia jam a me in Actis Erud. Anni 1685 Mense Septembri commemoratum fuerat, ne hoc loco cramben bis coctam sapiat, hoc ei condimentum adjiciam. Posse videlicet, absque nova totius horologii constructione, qualem prædicto loco supposui, omnibus aliis Portatilibus, illam circa binos axes conversionem, non difficulter conciliari, ac præsertim iis, quæ spirali, aut etiam recto elatere vibrationes librilis uniformes efficere debebunt. Horologium itaque usitata ratione jam constructum, thecæ cuidam extimæ (rejecta vel retenta, si lubet, pristina) includatur, intra quam aptata sit armilla quædam latior, in Ellipsin, horologio recipiendo, & firmiter retinendo idoneam, inflexa, & in sua minore Diametro, duabus oppositis cuspidibus instructa, circa quas, tanquam Polos, totum Horologium cum armilla intra thecam extimam, armilla non nihil ampliorem, converti circulariter possit: In Horologiis enim taliter gyrantibus, eorum librilis concedi poterit elater fortior, ac prædominans elateri majori, rotas omnes impellenti, ut hoc modo vibrationes librilis, inæquali rotarum dentatarum tractioni minus obnoxia sint, nec tamen primum impulsus sibi datum, & a rotis incitantibus conservatum, amittant.



COMMENTARIUM IN I. LIBRUM IN-  
stitutionum Juris Canonici, autore R. P. Jo. Baptista  
Neri a Petra Sancta Ordinis Minim. S. Francisci de Pau-  
la, Lectore Jubilato & Jur. Can. Professore.

Florentiæ, apud Petrum Matini, 1686, in 4.

**E**Diderat Autor, præter Sertum suum philosophicum, e scholasticis quæstionibus potissimum contextum, jam anno 1683 Commentarium in Jo. Pauli Lancellotti Institutionum Librum Secundum: quod cum non male cessasse ex amicorum approbatione, plura ejusmodi ut scribere pergeret, instigantium intelligeret, ordine præpostero nunc ad primum etiam librum commentario illustrandum semet applicuit, idque tanto libentius, quod interea temporis Juris etiam Canonici professio ipsi fuerit concredita, nec amplius ut antea extra oleas vagari adeo videri possit. Rationem vero, quare secundum librum prius adgredi maluerit, hanc reddit, quod a facilioribus incipiendum sibi putaverit. Methodus ab eo adhibita hæc est, ut & titulorum & paragraphorum seriem a Lancellotto servatam secutus, ea ad quemvis eorum congerere ac breviter exhibere satagat, quæ ab aliis Commentatoribus annotata reperit: moralistarum etiam dogmata & quæstiones nullibi non inspergat, citato plerumque sat magno autorum numero; quorum tamen haud omnes a se visos ipsemet ingenue fatetur. Cæterum rebus magis quam verbis intentum fuisse autorem nostrum, contextus passim loquitur, stylo quippe constans Latino quidem, at in tantum ad modernum Italiæ idioma sæpissime deflectente, ut vix eum plene intellecturus sit, nisi qui aliqualem phrasium Italicarum notitiam sibi compararit; id quod facile cuilibet librum inspicienti erit obvium. Quod reliquum est, promittit se, siquidem vitam Deus largiatur, propediem ad tertium etiam librum progressum facturum, ac uti in primo de personis, & in secundo de rebus egerit, ita in illo de Judiciis doctrinam plenius propositurum. Denique nec id tacendum, quod in hoc ad primum librum commentario, variis titulis per modum appendicis subjecerit diversarum conscientiæ quæstionum resolutiones, quas nempe in contextu ipso ob excursum prolixiorum pertractare minus congruum reputavit: concernunt vero hæc doctrinam de regula-



ribus, præscriptione, irregularitate, excommunicatione, debito spon-  
si erga sponsam, ingratitude, aliisque nonnullis materiis, quæ ex Syl-  
labo operi præmissis plenius cognosci poterunt.

**AVERTISSEMENT CHARITABLE A**  
*ceux, qui composoient autrefois les eglises de*  
*Poitou, & qui gemissent maintenant dans*  
*l'oppression.*

id est

**Admonitio ex charitate profecta ad illos, e quibus**  
**quondam Pictorum Ecclesiæ constabant, quique nunc**  
**sub oppressione gemunt.**

Coloniæ, 1686, in 12.

**P**ictavis suis persuasurus Autor, ut religioni reformatæ aut constan-  
ter adhæreant, aut si illam vi blanditiisve adacti ejurarint, posito  
metu ac hypocrisis postliminio accedant, argumenta selectiora profert,  
quibus tum Pontificii in Reformatos, tum hi in illos depugnare solent.  
Solvit ista, hæc urget. Cap. enim 1. probat, nec res secundas Papista-  
rum, nec adversas Reformatorum argumento esse posse, errare hos,  
non illos. Negat c. 2. soli Romanæ Ecclesiæ *Ecclesiæ* titulum compe-  
tere. Reformatos non novatores hæreticosve esse ob ea, quæ vel  
credunt, vel credere abnuunt, capite 3 & 4. disputat. Contra vero  
cap. 5. contendit, docere eosdem, quicquid aut ad sanctitatis studium,  
aut salutem consequendam quoquo modo faciat. Hinc tela mon-  
strat, quibus secus sentientes peti queant. Nimirum c. 6 & 7. tum  
doctrinam, tum disciplinam Pontificiorum ἀγέαΦov; cap. 8 & 9. u-  
tramque ἀντιγέαΦov esse, ostendere allaborat. Concludit inde c. 10.  
neminem in Religione Papistica salvari posse. Præmissis his, quæ mil-  
lies pridem dicta sunt, subjungit ea, quæ, ut libelli aliquam mentionem  
faceremus, mereri visa sunt. Capitibus quippe 11 & 12. duriora illa fa-  
ta prolixè recenset, quæ reformatæ Pictorum Ecclesiæ a pace Pyrenæa  
usque ad edicti Nannetenensis abolitionem subierunt. Quamvis enim  
historiographorum id genus mentionem hæctenus parcissimam feci-

mus,



mus, illius tamen causa cum primis erat, quod a *Johanne Claudio* Ministro quondam Charentonensi, post exule, tandem Hagiensi pastore & historiographo Arausionensi, motuum nuperorum Gallicorum historiam omnibus numeris absolutissimam expectaremus. Ex quo vero spes isthac cum doctissimo viro d. 17. Jan. st. n. hoc ipso anno, extincta fuit, non temnendos putamus, qui ex parte saltem, quid annis superioribus in Galliis religionis causa aut obtentu contigerit, referunt. An vere, an falso, dicere nec possumus, nec volumus. Nec enim alteri parti advocati defunt, qui longe clementius & Christianis moribus convenientius cum reformatæ religionis hominibus actum fuisse, orbi persuadere nituntur. Nobis igitur authorum hujusmodi nomina indicasse sufficit. At Anonymus ille exul ulterius procedi, & ex iis, quæ adversus Reformatos a Clero Gallicano hactenus acta sunt, judicium ferri cupit, quam bona sit, quam Evangelio conveniat ipsorum doctrina. Id quod c. 3. facit, adjunctis parænesibus & consolationibus ad eos, quorum gratia libellum hunc exaravit.

## HEINRICI MEIBOMII AD SAXONIÆ Inferioris imprimis Historiam Introductio.

Helmstadii, apud Georg-Wolfgangum Hammium,  
1687. in 4.

Saxonix & Saxonum historiam plenius auditoribus suis in Academia Julia traditurus *Meibomius polyhistor clarissimus*, non abs re fore existimavit, si προπαρδείας χάριν hanc, quam nominavimus, *Introductionem* præmitteret, ut prægustum & auditores sui, & alii historix ejus cupidi lectores haberent. In qua, a prima origine veteris Saxonix terminos, a recentiori & nova decem in Germania circulorum divisione in superiorem & inferiorem facta, diversos contendit; quippe qui & Henetorum & Westphalorum terras ceu colonias Saxonum comprehendissent. Deinde juxta temporum seriem, historix Saxonix summam quasi exhibere aggressus, animadvertit, *Claudium Ptolemeum*, qui sub Antonino Pio Imper. claruit, *lib. II. c. XI.* primum gentis fortissimæ, sub Σαξόνων nomine meminisse, eosque ἐπὶ τὸν ἀυχὲνα τῆς Κιμβρικῆς χερσονήσου h. e. ad *Cimbrica peninsula cervicem*, quæ *Holsatorum* hodie est, collocasse. Inde hos, subsequenter proximi,



me seculis, rei nauticæ deditos latius progressos, anno Christi 449 in Britanniam vocatos, post varia bella, nova ibidem regna condidisse: quorum *Cambdenus in Britannia sua, & Langhornius in Antiquitatibus Albionensibus* sub finem, & in *Chronico Regum Anglorum pag. 5.* mentionem injiciunt. Seculo sexto, data ipsis per Francos occasione, terminos suos per Thuringiam promovisse, sociosque Francorum & amicos appellatos. Hinc seculo VII & VIII Saxones per bella cum Francis gesta, celebriores factos, in tres gentes, *Ostwalos* (alias Ostfalos, Osterlingos & Austerlandos dictos) *Westphalos & Angarios* divisos, atque dein a Carolo M. post acerrimum XXXII annorum bellum, subactos tandem ac ad fidem Christianam conversos fuisse, ex *Eginbardo* tradit: quo facto, ut imperium Carolus in Saxonia extenderit, non tamen assumpto, quod aliqui volunt, *Dominatoris Saxonum* titulo; item, ut sacra ordinaret Christiana, destructis eorum fanis & idolis, exponit. Post Caroli M. excessum, Saxones, qui fidelitatem Regi & filiis ejus, nec non etiam Francis promiserant, eandem Ludovico Pio servasse docet. Sed cum Caroli M. posteri Aquilonaris Saxoniam parvam haberent curam, Slavos & Normannos seu Danos illam graviter afflixisse, clade non una illata, observat. Qua occasione duces sibi Saxones assumpsisse, conjicit, qui adversus vim hostium sibi essent præsidio. Ludolphum enim anno DCCCLVI se ducem Saxoniam scripsisse, in tabulis foundationum monasterii Brunefasani & Gandersheimensis probat: cujus filius Otto, Heinrici Aucupis pater, ad summam Imperii dignitatem vocatus legitur; etsi ob ingravescentem ætatem, eam recusavit. Sequentibus ergo temporibus sub Heinrico laudato & Ottonibus, Regibus & Imperatoribus magnis, Saxoniam caput extollere maxime cepisse, urbesque in ea celebres fundatas & munitas fuisse notat. Hinc postquam ad Suevicos principes a Saxonibus Imperialis apex devenisset, majores tum Saxones spiritus cepisse, libertatem, rejecta potestate Regia, affectantes. Quæ res sub Heinrico IV ætatis nondum maturæ Imperatore, gravissimi & diuturni belli causa extitit. Quo confecto *Lotharium* laudat, quod non in Germaniam universam tantum meritis illustris, sed maxime in Saxoniam fuerit; quippe qui magno ejus bono, Heinricum Bavarie ducem, data ei in matrimonium filia in has terras vocasset, ducatumque Saxoniam eidem contulisset; quo ipso Serenissima Domus, quæ nunc Brunsvico-Lunæburgica audit, in



Saxonia fundata fueret. Quæ ut variis deinde fatis, sub Conrado III & Friderico I Imperatoribus jactata sit, ex Chronico Helmoldi tradit. Nempe, quod sub Friderico I Westphalia & Angaria a Saxonia avulsa, & proprio ducatu insignita fuerit. Qua de causa, imminuta sic veteris Saxonie potentia, dux Saxonie novus, priori potentia impar, in superiori Saxonia Wittebergæ ad Albim sedem constituit suam. Hinc mutationem status in Saxonia per Ottonem, Henrici Leonis nepotem, factam describit. Nam anno 1235 mense Augusto, novum ducatum Brunsvicensem & Lunæburgensem in Saxonia a Friderico II Imperatore stabilitum fuisse probat. Ex quo tempore major in Saxonia inferiori quies fuit. In hac narratione, originem fœderis urbium Hanseaticarum anno 1241. facti, simul attingit, & ad topographiam ac historiam ecclesiasticam Saxonicam digreditur, adductis & laudatis ejus tum veteribus, tum novis clarissimis scriptoribus. Quibus indicem scriptorum etiam genealogicorum Saxoniorum subjungit, introductionem hanc eruditissimam finiens.

*DE NOVITIO OPERE, QUOD INSCRIBITUR Prædestinatus, Auctoris anonymi Semipelagiani (in re, sub Prædestinatorum nomine scribentis adversus divos sancti Patris Augustini discipulos) consarcinato (ut supponitur) anno 434 tempore Prosperi, nuper reperto & impresso in Gallis, & a nemine hætenus revocato ad examen, nova Quæstio Historico-Theologica, autore F. Seraphino Piccinardo Brixienti Ord. Prædicatorum, provinciæ Margistro ac Theologo Primario Patavii in via S. Thomæ.*

Patavii, sumptibus Petri Mariæ Frambottii

1686, in 4.

Quatuor supra quadraginta elapsi sunt anni, ex quo *Jacobus Simonius*, Jesuiticæ Societatis Presbyter jam senex, post plurima alia novum aliquod antiquitatis ecclesiasticæ monumentum, in Mariæ Remensis bibliotheca sine Autoris nomine repertum, e tenebris produxit. Quod etiam *Hincmarus Remensis Hygino*, alii *Primasio* tribuissent, & ipse



& ipse ex styli & sententiarum affinitate autorē ejus *Arnobium* juniorem deprehendisse sibi videretur; nihilominus tamen, cum & suæ ipsius divinationi minus fideret, & aliorum judicia falsis præsumtionibus inniti crederet, *Prædestinati* titulo signare maluit.

Prædestinatorum enim hæresin Autor ille, quisquis fuerit, triparto hoc opusculo quantis potest viribus impugnat, ac primum quidem 90 hæreses recenset, in quo catalogo cum Pelagiana, Nestoriana, & Prædestinatiana ultimo compareant loco, Autorem hunc nondum exorto Eutyche, & ante *Gennadium* Massiliensem scripsisse, Sirmondus conjicit. Deinde vero libellum prædestinatianis erroribus confectum, & a Prædestinatis sub *Augustini*, ut inscriptio habet, nomine confictum exhibet, quem postea tertia opusculi parte non sine magna verborum acrimonia confutat.

Non poterat Autoris hujus editio iis non ægre facere, qui e *Calvini* & *Jansenii* schola, ipsam Augustini & orthodoxæ ecclesiæ doctrinam a Pelagianis & Semipelagianis prædestinatianæ hæreseos titulo infamatam, dicere solebant. Quocirca mirum videri posset, si quod *Piccinaro* nostro visum, ab eo tempore, quo *Sirmondi* studio Prædestinatus in publicum prodiit, quod A. C. 1643 factum est, primus omnium *Natalis Alexander* paucis abhinc annis causam istam unica pagella tetigisset, cæterique omnes cum *Theophilo Raynaudo* & *Vincenzio Contenzonio*, aut sine examine præterissent, aut unica linea despexissent, adeoque nemo hæctenus Prædestinati opus ad examen revocasset.

At secus quam *Piccinaro* putat, contigisse, vel sola *Jobannis Avraei* Doctoris Sorbonici censura, altero statim post Prædestinatum anno edita testari potest, quæ Autorem hunc anonymum plurimorum errorum, Pelagianismi aliarumque hæresum, mendaciorum, fabularum, crassæ ignorantæ & foedissimæ imposturæ arguit, quod librum, quem sub Augustini nomine confictum asserit, ipse sinxerit, cum ex omnibus styli lineamentis una & confutantis & confutati appareat facies. E quibus tandem concludit, Autorem istum ascititio Prædestinati nomine prodeuntem, tanquam hominem nullius eruditionis & conscientiæ, idoneum non esse, qui in minima re testari, nedum judicis aut arbitri partes sibi vindicare possit. Hæc *Avraei* censura Gallice ab Autore scripta, paulo post, nempe A. 1645 in Latinum sermonem conversa, & ipsi Prædestinato annexa, in Belgio denuo lucem publicam



blicam aspexit. Quid *Gilbertus Mauguinus* in confutatione fabulæ prædestinatianæ c. 4. alique plures de Prædestinato Sirmondi statuerint, recensere nolumus, ne a Piccinardo nostro longius divagemur, qui etsi in examine hujus operis antecessores haud paucos habuerit, reliquos tamen omnes nunciandi audacia superat, & multa in medium producit, quæ nondum cuiquam hætenus in mentem venisse legimus.

Autorem enim Prædestinati a Sirmondo vulgati *Vincentium* appellat, siquidem 16. objectiones Vincentianas, quas *Prospero* Aquitanus confutavit, ex hoc ipso Prædestinati opere excerptas collatione facta probare contendit. Etsi enim nonnulla objectionum istarum capita, videlicet 9. 10. 11. & 16. in Prædestinato expressis verbis non occurrant, ex cæteris tamen ea consequi judicat. Afferit insuper, Autorem Prædestinati in fine operis, vel epilogi vel indiculi instar, omnia ista sedecim errorum capita Augustini discipulis, imprimis vero *Prospero* & *Hilario* per calumniam objecta, lectorum oculis conspicienda præbuisse. Cumque indiculus iste in Prædestinato hodie non amplius compareat, eundem vel injuria temporum detritum, vel ab editoribus eo fine omissum suspicatur, ut autorem hunc eo felicius pro catholico venditare possent, neve *Vincentii Semipelagiani* a *Prospero* refutati vestigia manifesto deprehenderentur. Ne autem quæ de sedecim errorum indice vel epilogo differit, gratis affirmare videatur, primum *Prosperi* testimonium adducit, qui in responsione ad objectiones Vincentianas ad hunc ipsum Prædestinati indiculum respiciens dicit: *contexunt, & qualibus possunt sententiis comprehendunt ineptissimarum quarundam blasphemiarum prodigiosa mendacia, eaque ostendenda & ingerenda multis publice privatimque circumferunt, asserentes talia esse in nostro sensu, qualia diabolico indiculo continentur.* Deinde quoque ad *Hincmarum* Remensem provocat, qui in epistola ad *Carolus* Calvum apud *Flodoardum* lib. 3. c. 15. post recensita nonnullorum scripta, quæ sibi opposita fuerant, hunc in modum pergit: *inseruerunt etiam in iisdem suis scriptis de quibusdam sedecim capitulis, quasi nobis debeant imputari, de quibus nihil audivimus neque vidimus, antequam venerabilis Ebbo Gratianopolitanus episcopus vobis ea, quasi a bone memorie Fratris vestri Lothario transmissa detulit, quorum capitulorum Autorem nec adnotatum invenimus, nec cum multum quaesivimus, invenire valuimus.* His enim verbis Autorem Prædestinati ejusque indiculum ab



Hincmaro indicari cenſet, quia Rege Lothario Caroli Calvi Fratrem ad Ebbonem tranſmiſſus, & ab Ebbone publicatus in Hincmari manus venerit. Ac ne quis objiciat, verba Hincmari, quibus Autorem iſtorum ſedecim capitulorum ſibi plane incognitum teſtatur, ad Autorem Prædeſtinati minime pertinere poſſe, cum Hincmarus in opere ſuo de prædeſtinatione Autorem Prædeſtinati ſemel iterumque Hyginum appellaverit, Piccinardus tempora diſtinguenda monet. Anno enim 856, quo Hincmarus prius ſuum de prædeſtinatione opus elucubra- vit, cujus ſola præfatio ad Regem Carolum ſuperest, nondum ipſi quicquam de Autore hujus operis conſtituiſſe, at anno 859, quo poſterius de prædeſtinatione opus evulgavit, cum jam per triennium ſcriptum hoc perluſtrandi commodiorem occaſionem habuiſſet, ex argumen- to libelli primi minus recte intellecto Hyginum pro Autore habuiſſe cenſet.

Porro cum plures quinto ſeculo Vincentii fuerint, *Vincentium Li- rinenſem* ab opere Prædeſtinati alienum pronunciat. Eſt enim ſibi ipſe objiciat, quod Vincentius Lirinensis ab *Henrico Noriſo & Natali Ale- xandro* Semipelagianæ hæreſeos argnatur, & ſcripta ſua ſub *Peregrini* nomine ediderit, ex quo fortasſe Hincmari errorem natum eſſe cogi- tari poſſit, qui characteribus antiquitate nonnihil obliteratedis pro Peregrino *Hyginum* legerit, objectiones tamen iſtas parum habere robo- ris reſpondet, cum & Vincentium Lirinensem a Pelagianæ labe, quod ali- bi a ſe probatum aſſerit, immunem fuiſſe, & illum Hincmari errorem aliunde promanare conſtet. Vincentio igitur Lirinensi abſoluto, ali- ud Vincentiorum par adducit, nimirum Vincentium *Psalmorum* in- terpretem, a Gennadio c. 80. de Scriptoribus Eccleſ. commendatum, & alterum cognomento *Victorem*, adverſus quem Augustinus libros quatuor de origine animæ composuit. Ex his duobus Vincentiis alteru- trum Prædeſtinati opus edidiſſe Piccinardus ita ſtatuit, ut ferme magis ad Vincentium *Victorem* inclinare videatur.

De cætero hunc Prædeſtinati autorem Vincentium, a *Proſpero* non modo in reſponſione ad objectiones Vincentianas ex inſtituto confutatum, ſed & in poſterioribus ejuſdem ſcriptis, imprimis vero in commentario ad quinque poſtremas *Psalmorum* decades, & in libris de vocatione gentium obiter perſtrictum aſſerit. Lectum quoque eundem Prædeſtinati Autorem ab *Arnobio* juniori ex eo arguit, quod  
ſimili-



similibus verbis & argumentis contra Prædestinatos usus fuerit, etsi ab Autore Prædestinati in eo differat, quod contra Prædestinatos agens, in medio veritatis consistens ad alterum Semipelagianismi extremum non deflexerit, quod contra *Natalem Alexandrum* & alios *Arnobium Juniores* Semipelagianis annumerantes eo sine probandum suscipit, ut Prædestinati opus Semipelagianum autorem redolens, *Arnobio Juniori* perperam tribui simul evincat.

Præter *Prosperum Vincentio* se opposuisse tradit *Autorem ὑπογῳστικῶν*, quæ *Augustini Tom. 7.* leguntur. Hunc enim toto libro 6, cum priores quinque *Julianum* tangant, Prædestinati Autorem aggressi statuit. Qua occasione de Autore istorum hypognosticon disquirat, & quamvis *Johannis Garnerii* rationes pro *Sixto* seu *Xylo* III. probabiles censeat, easque contra *Natalis Alexandri* objecta dubia defendat, verisimilius tamen ipsi videtur, libros istos a *Mario Mercatore* compositos fuisse, qui post subnotationes in *Julianum* plenius, hoc opus jam in subnotationibus promissum elucubraverit, & Græcæ linguæ non imperitus Græco hoc titulo insigniverit.

Quantum autem ad secundum Prædestinati librum attinet, qui sub *Augustini* nomine confectus inscribitur, ejus Autorem *Piccinardus Evodium Uzalensem* esse pronunciat, qui cum apud *Adrumetinos monachos* Prædestinatorum hæresis exorta jam fuisset, a *Valentino Abbate* rogatus, sententiam suam & alia quadam epistola, & hoc ipso libello indicaverit. Et quamvis epistola *Augustini 95.* *Evodium* a Prædestinatorum errore absolvere videatur, *Piccinardus* tamen ex libro 3. *Augustini* de libero arbitrio contrarium affirmat. Porro suspicatur, fortasse *Evodium* libello suo hunc præfixisse titulum: *expositio doctrinae Augustini*. Cumque hic libellus forte una cum nonnullis *Augustini* scriptis ad *Massilienses* allatus fuerit, inde per errorem contigisse, ut hic libellus pro *Augustini* foetu habitus fuerit, nisi forte *Massilienses* ex malitia *Augustinum* Prædestinatorum erroribus involvere ausi fuerint. Posteaquam vero *Cælestinus P. R.* *Prosperi* monitu, damnatis *Semipelagianis* pro *Augustino* sententiam dixerit, *Massilienses* *Augustinum* ipsum non amplius adortos, in ipsius discipulos omne calumniarum virus effudisse, adeoque Autorem Prædestinati libellum, quem *Evodius* scripserat, ab *Augustini* discipulis sub *Augustini* nomine confectum affirmasse.



In corollariis primæ sectionis, inter quæ primum locum obtinet realis antiquæ hæreseos Prædestinantiæ existentia, item in consecrariis sectionis tertiæ, quæ inscribitur antidotum adversus ea, quæ in autore Prædestinati caveri debent, alios etiam Autores censuræ suæ Piccinardus subjicit, imprimis *Hincmarum* Remensem, cujus novem errata perstringit, & e recentioribus *M. Antonium de Dominis*, *Jacobum Sirmondum*, *Andream Junium*, *Christophorum de Orthege* & *Theophilum Raynaudum*, ultimo vero loco nonnulla de *Prospero* ejusq; scriptis disserit, ejusdemq; responsionem ad 16 objectiones Vincentii subjungit.

Hæc ex prima & tertia sectione, quibus opus Prædestinati ad examen revocatur, paucis notare libuit. Secunda enim sectio ipsum Prædestinati opus complectitur, ex tomo 27. bibliothecæ Patrum Lugdunensis denuo editum, ita tamen, ut loco præfationis Sirmondianæ, qua opus illud commendatum fuerat, admonitio ad lectorem de cavendis hujus libri erroribus præmissa deprehendatur, in qua graviter Piccinardus queritur, autorem hunc Pelagianum aut saltem Semipelagianum, ipso Fausto Rejensi crassiolem, non modo sine censura, verum etiam cum Sirmondi elogio Sanctis ecclesiæ Patribus additum fuisse.

## A CONTINUATION OF THE NEVV Digest of Bones &c.

five,

Continuatio novi Digestoris Ossium, autore Dionys. Papino, M. D. & Societatis Regiæ Socio.

Londini, apud Joseph. Streater, 1687, in 4.

SEXENNium jam fere elapsum est, ex quo ingeniosissimus Autor modum curioso orbi aperuit, mediante aeris & aquæ bullientis compressione res durissimas, ipsaque etiam ossa ad gratam & esui aptam molliem, intra paucum tempus percoquendi, gelatinas varias non compendiose miuus, quam copiose parandi, aliasque quamplurimas res, in vita communi summe proficuas, efficiendi; quemadmodum tam de machina hunc in finem inventa, quam ejus operationibus dictum pluribus fuit in *Actis anni 1682. pag. 105. seq. & pag. 305. seq.* quorsum brevitas causa benevolum Lectorem pro pleniori eorum, quæ

mox



mox a nobis dicenda erunt, intellectu remissum volumus. Tamen  
 vero in scripto tunc edito insignem & multifariam hujus rei utilitatem,  
 cum operandi facilitate conjunctam, ad oculum demonstrasset, nihi-  
 lominus mirabundum se hactenus animadvertisse scribit, a paucissimis  
 inventum hoc in usum fuisse deductum, plerisque id pro infructuosa  
 curiositate reputantibus; qua in parte non dissimile ejus fatum ab eo,  
 quod molæ tam aquaticæ quam pneumaticæ olim passæ sunt, agnoscit,  
 utpote quarum machinam, qua tamen hodie carere absque summa  
 molestia haud possimus, primitus ab ipso etiam Plinio, perspicacissimo  
 alioquin, itidem mere inter curiosas speculationes recensitam allegat.  
 Ut proinde homines de hujus inventi emolumentis plenius convince-  
 rentur, non solum cuilibet licentiam facit, ipsius operationes semel per  
 septimanam, loco a tempore præfixis, instituendas coram spectandi;  
 sed & præsentî Tractatu (quem Johanni Comiti Carberix, Societatis  
 Regiæ nunc Præsidi inscripsit,) perfectiorem adhuc & pluribus sufful-  
 tam experimentis notitiam communicare, ornâemque sic ulteriorem  
 dubitationem residuamve obscuritatem tollere adgressus est. Ac primo  
 quidem occupatus est in describenda nova hujus machinæ forma, qua-  
 lem ad mandatum defuncti proxime Regis, pro ipsius Laboratorio in  
*Whitehall* construi fecerit: quæ ipsa tamen cum quoad partes essentia-  
 les parum aut nihil differat ab ea, quam anno 1682. pag. 106. descriptam,  
 ibidemque *tab. 6. fig. 1. 2.* depictam dedimus, (nisi quod exterior ejus  
 fabrica, simpliciori facie comparens, & tantum non lebetem vulgarem  
 mentiens, facilius artificium tegat) hinc ei de novo hic prolixius deli-  
 neandæ non immorabimur, satis fore existimantes, si paucissimis indi-  
 caverimus, quanam potissimæ inter novam hanc & priorem illam  
 machinæ structuram differentiæ intercedant. Nimirum ne dicamus,  
 exterioris lebetis operculum, quod antea duabus modo cochleis clau-  
 debatur, nunc earum quatuor habere: item, interioris lebetis orificium  
 seu aperturam notabiliter extra aquam, cui immittitur, eminere, mi-  
 nusque adeo ac antea, periculi esse, ne eo post peractam coctionem a-  
 perto, aqua influens forte res coctas earumve saporem corrumpat:  
 præcipuum discrimen in eo consistit, quod foramen in operculo lebe-  
 tis extimi (cui immissus canalus cum incumbente obturaculo antea  
 gradus internæ pressionis moderabatur) nunc penitus omissum sit,  
 multisque adeo ambagibus hoc pacto machina liberata. Tamen



enim primarium hujus inventi fundamentum in eo sūū sit, quod quemadmodum corpora alia ignita, quo compactiora sunt, eo magis adurunt, ( uti v. g. ferrum candens fortius carbone fervet ) ita & aqua bulliens, quo magis per compressionem ejus rarefactio ac dilatatio impeditur, eo potentius in res immerfas agit: attamen cum ea propter non opus sit gradus pressionis adeo scrupulose observare, satius existimavit, machinam semota penitus hac molestia simpliciore, adeoque usui magis accommodam exhibere; maxime cum antehac foraminis istius quandoque contingens apertio, plures corrupisse operationes comperita sit. Sufficit etenim, uti Autor jam in priori tractatu monuit, ommissa pressionis graduum computatione, id modo observare, ut semper eadem aquæ quantitas exteriori lebeti seu novo huic MB. infundatur, ac vase dein probe clauso diligenter annotare, quinam caloris gradus singulis operationibus congruat; id quod compendiose efficere pariter jam antehac docuit, pondere nempe suspenso ad parietem e filo 3 circiter pedum, cujusque adeo singulæ vibrationes prope singula minuta secunda indicent; sic ut deinceps ad gradum caloris indagandum non alio opus sit, quam ut perpendiculo hoc in motu posito observetur, intra quot ejus vibrationes aquæ gutta machinæ operculo, ab omni pinguedine bene mundato, injecta evaporet. Cæterum & id addere consultum putavit Autor, posse aliqualem communicationem relinquere aeri vasis exterioris cum lebete intus posito, idque eo fine, ne si exterius, ut plerumque fit, citius incalcescat, pressio inde enata vas interius omnino queat frangere; quod plus vice simplici contigisse sibi, ut hoc satis fuerit validum, perhibet.





Tametsi vero machina hac, novis præsertim his accessionibus aucta, commodius inventum dari vix posse existimet, ad carnes aliasve res absque aqua, proprioque adeo ipsarum jure coquendas, nihilominus cum multa dentur, quæ absque affusa aqua coctionem respuant, v. g. gelatinæ, fabæ, oryza &c. faciliorem adhuc & minoribus multo sumtibus parabilem modum nunc noviter communicat, res ejusmodi, quæ affuso liquore indigent, brevi manu præparandi, eosdemque earum intuitu cum priori illa machina effectus producendi. Scilicet fieri jubet cylindrum cavum in fundo clausum, at in summitate apertum, stanno intrinsecus crasse satis oblitum, ne alioquin æris sapor cocta inficiat,

forma,











forma, qualem exhibet *fig. 1.* cui aptatur operculum plana saltem superficiei constans, ut in *fig. 2.* videre est, quod pariter stanno obducendum; planitie tamen cylindri orificio tam exacte respondens, ut interposito chartæ humectatæ circulo (ut pote quo tam in priori, quam hac machina ad omnes operationes opus est,) æ minimus quidem aeri transitus pateat. Hic cylindrus dein ipse, (absque alio interiori lebetæ, utpote quo hic opus non est) aqua & ossibus, si v. g. gelatina paranda sit, repletur usque ad unius circiter pollicis spatium, si vas hoc itz pollicum profunditatem habeat, cæterum secundum aliam hujus proportionem magis minusve. Ita vas hoc cylindraceum immittitur pegmati ferreo, quale *fig. 3.* representatum, aptissimum judicat ei exactissime claudendo, dum nempe ferramentorum duorum, quibus vas insidit, extremitates *BB CC.* (quas paulo magis elatas esse oportet, quam spatium intermedium) directe opponuntur quatuor cochleis *FFF F* operculum prementibus, ut adeo pressio ubivis æqualiter distributa tanto fortior esse queat. Habet præterea pegma hoc ferreum duos in latere axes *DD*, quibus mediantibus suspensum, ope funium aut fulcri ferrei, facile inverti cum inclusa machina pro lubitu queat. Talis enim inversio non ad id solum conducit, ut circulus papyraceus, cujus supra meminimus, continuo humidus servari queat, nec calor vi exsiccatas aeri transitum permittat: sed & ut machina in situ horizontali supra ignem immediate subjectum collocari, citiusque adeo & impensius calefieri possit: cui fini etiam adjecti sunt duo cardines ferrei *E. E.* ut nempe affigi illis valeat fornacis quædam species, seu lamina ad carbones excipiendos aptata, figuram craticulæ habens, aut aliquoties saltem perforata, quo subjecti aeris sufflatio ad ignem fortius impellendum sic quodammodo adjuvetur. Cæterum cum conflet, cibos facillime ollæ lateri, quod igni admovetur, inter coquendum adhærescere, adustosque adeo reddi; quo periculo huic obviaret, modum commentus est, quo aqua continuo inter ollam cibumque immisissum interjecta servari possit, omneque adeo empyreuma præaveri. Videlicet utitur hanc in rem lamina stannea, curvata in similitudinem cylindri cujusdam cavi, ac sustentata pedunculis aliquot; quam collocat in eo machinæ latere, quod igni admovendum est, ut sic spatium istud, quod pedunculorum altitudo relinquit, aquæ interfluxu totum pateat. Prærogativas vero varias novæ hujus machinæ digestoriæ præ priori illa allegat: v. g.

quod



quod ad hanc parandam multo minus metalli requiratur, eaque proinde levioribus sumtibus comparetur; quod plus gelatinæ hic quavis vice excoqui possit, dum major vasis est capacitas; quod minus carbonum hic ad coctionem requiratur, dum ignis immediate subter machinam positus fortius operatur, quam si lateri saltem admo- veretur; sicut experimento comperit, quantitate fere dimidia carbo- num, ad priorem machinam requisitorum, hic supersederi posse: porro, quod machina hæc facili negotio agitari valeat, quam succussionem multum conducere ait ad celeriore glutinosarum particularum disso- lutionem in parandis gelatinis; quod post peractam operationem lebes hic facilius & absque metu ebullitionis, etiam antequam omnino re- frixerit, aperiri, & liquor coctus educi queat; inversa enim machina cochleas paulatim relaxari posse, donec hic ter. irvena effluat in suppo- situm vasculum. Navigantibus vero, (utpote quorum usibus primam etiam illam machinam imprimis commendatam antehac jam diximus) hanc multo adhuc commodiorem fore credit, dum non saltem agi- tatio ei nil quidquam officit, quæ in vulgaribus caldariis aquam facile dispergeret, sed & fornax hic applicanda sic muniri exiguo ne- gocio potest, ne ab igne periculi quidquam in navi metuendum sit, Cui accedit, quod hic non solum multo minus aquæ dulcis absumatur in paranda gelatina, coquenda oryza & similibus, sed & carbonibus admodum parcatur, uti jam supra dictum; imprimis si operatio sapius, & antequam lebes omnino refrixerit, iteretur: quemadmodum com- putum iniit, quod gelatinæ, saluberrimum navigantibus alimentum præbituræ, 150 libræ intra 24 horarum spatium excoqui possint, in- sumtis modo carbonum II circiter libris. Quanta vero gelatinæ co- pia ope hujus inventi elici possit, vel exinde patet, quod Autor ex una libra rasuræ eboris excoxerit tribus operationibus usque ad 15 libras gelatinæ optimæ: nec minoré quantitaté ex ossibus ovinis aliisve haberi posse existimat, dummodo suppetat medium, eadem æque facile ac- bur comminuendi. De cætero varia Autor experimenta recenset, quæ de novo hoc digestore in diversarum materiarum coctione ceperit, commemoratis ubique fideliter circumstantiis occurrentibus, ac spe- ciatim, quonam gradu calor in singulis operationibus fuerit adhibitus. Sic mediante hoc invento sincturam e polenta extrahere, & probati sa- poris cerevisiam conficere docet; utut fateatur majora pro hoc institu- to vasa paranda fore, siquidem alicui sic potum talem copiose & cum emolu-



emolumento præparare lubeat: sic enarrat porro, qua ratione succum spissum e dura liquiritiæ radice facili negotio confecerit, item ex viperis, (cum earum sal volatile adeo in medicina commendetur) gelatinæ speciem excoxerit; per quam operationem id incommodi præveniri posse autumat, ne salis illius volatilis magna pars exhalet inter præparandum, uti alias contingat, si hoc in aere libero fiat. Cumque idem vulgari *Chocolata* coctione evenire animadverterit, ut nempe spiritus volatiliores inter parandum perdantur, dum hæc antequam potui apta fiat, tribus fere vicibus igni soleat admoveri, hinc tentavit ipsam quoque in clausa hac machina præparare; comperitque ex nucibus *Cacao* tincturam sic commode, tertia etiam vice noviter affusa aqua elici posse, nucibus tandem adeo exhaustis, ut formam quidem externam servant, molles plane & nudis digitis friabiles evadant: unde concludit, elicito sic omni earum succo laudabili, remanere tantum particulas glutinosas ac terrestres; quas adeo (præsertim cum ab *Edm. King* edoctus fuerit, eas ipsas noxios sæpe effectus gignere,) vel semovendas penitus credit, vel, si cui nihilominus eas etiam una assumere libeat, in mortario ligneo aut marmoreo facilius tritas tincturæ admisceri posse existimat. Præterea cum viderit, Norimbergæ aliisque in locis e mollioribus lignis pyxides aliave instrumenta parari, quæ impressam sibi typi excavati figuram recipiant, speciemque anaglyphi operis mentiantur, hinc experiri simile quid in machina sua voluit, an sc. duriora etiam ligna coctionis ope ad commodam ejusmodi mollietiem perducî valerent: primum quidem adsumto hanc in rem *ligno vite*, cum hoc tanquam resinofum aqua domari posse desperaret; id cum therebinthina, ac dein cum spiritu therebinthinæ igni adposuit, frustraneo tamen eventu, utut calor & major & diuturnior, quam ad emollienda ossa, adhiberetur: postea nihilominus præter expectationem apparuit, nudam aquam huic rei sufficere, dum ita coctum lignum molle & aptum recipiendæ typi figuræ evasit: ubi id solum monet, necessum esse ut lignum sub typo pressum relinquatur, donec omnino siccum evaserit; alias enim fieri, ut partes ejus elastica quadam vi sensim resilientes magnam impactæ figuræ portionem perdant: cæterum buxum adhuc commodius hanc in rem adhiberi testatur. Cornua etiam bovina emollire tentavit ita, ut liquidi ad instar modulo infundi valerent: nec hic tamen effectus conatui omnino respondit: id nihilominus obtinuit, ut



it, ut partes ipsorum extreme tumefcentes ac molles reddita, si intra modulum compingerentur, unum quasi corpus emergerent & qualemcunque sic formam pro lubitu adsumerent, modo in tali situ in modulo relicta siccarentur. Quod reliquum est, cum ope machinae hujus digestoriae tantam gelatinae copiam ex ossibus educi posse viderit, id quoque egit, ut variis experimentis tentaret, num forte novis etiam visibus praeter comestionem, viscidus hic liquor posthac adhiberi valeat. Ac primo quidem docet, qua ratione gelatinae spissiore liquefacta, & variis sigillis ac numismatis superinfusa, exactissimi eorum ectypi inde proveniant: quin imo narrat, ectypum talem a sigillo, antequam plane siccaretur, demtum, in minutissimam formam paulatim exsiccando contractum, tam accurata tamen proportione singulas sigilli partes servasse, ut figurae microscopio etiam ob exiguitatem inspectae, nil quidquam perfectionis hoc pacto decessisse fuerit deprehensam. Potissimam tamen gelatinae hujus utilitatem in adservandis diversorum generum fructibus fore speravit; sibi etenim persuasit futurum, ut intra vitrum cochleis probe occlusum, & ab omni aeris accessu liberum, in glutinoso hoc liquore haud secus ac in succino inclusi, substantiam suam maxima ex parte illibatam multo satis tempore conservare possent. Tametsi autem & hic spe sua quadantenus exciderit, dum expertus est, fructus ita inclusos brevi tempore tantum non penitus corrugari, & succo per corticem transmissio (quod non sine stupore se in malis etiam aurantiis & citrinis advertisse scribit) gelatinae molem augere: nihilominus modum hunc fructus praeservandi omnibus hactenus usitatis praestare autumat, cum ob sumtuum levitatem, tum ob exactiorem saporis nativi retentionem; dum quod fructui de succo decessit, gelatinae accrescit, ut adeo ejus sapor in futura anni tempora conservari commode tam ad salubritatem, quam curiositatem queat. Cum vero deprehensum fuerit, gelatinam talem successu temporis graviusculum odorem spirare; hinc ne quis eo forte offendatur, non solum docet, eundem mali aut corrupti nihil indicare, sed non nisi ab insitis salibus volatilibus provenire, qualia multum saepe conducere offendit exemplo salis volatilium cornu cervi: sed & modum demonstrat, quo in gratiam delicatulorum (plurimos enim id vix gustantes advertere) hoc quidquid est odoris corrigi valeat. De quo, ut & multifariis experimentis, quibus indagavit, quinam fructus magis minusve

ob in-



obinsitam qualitatem apti sint huic præservationi (quo nomine præ aliis rubi mora commendat) plura hic afferre superfedemus, ne longe nimis extra institutum evagari videamur. Flores quoque ita adservare tentavit, non tamen satis ad votum, dum observasse semet perhibet, eos in se habere principia perquam activa & ad fermentandum apta, quæque spiritus non absimiles vini spiritibus producere soleant. Cum vero gelatina, quæ ad usus talismodi adhibetur, multum per evaporationem inspissata prius esse debeat: hinc occasione hac modum monstrat, evaporationem non hujus saltem, sed & aliorum quorumvis liquorum accelerandi, ope nempe vermicularis spiræ excavatæ, cujus usus alias in chymicis quoque ad spirituum condensationem facilitandam esse solet: nimirum spira hæc foramini vasis in fundo pertusi inseritur, ut *fig. 4.* ostendit, sicut lampadi accensæ, fundo suppositæ, eadem camini quasi loco inserviens calorem ex æquo undique diffundat. Certe existimat Autor, instrumenti hujus usum varii generis artificibus, qui pro evaporatione multum sæpe expensarum facere necessarium habeant, perquam proficuum esse posse. Denique quamvis idem jam in priori tractatu edocuerit, machinam a se inventam etiam ad varias destillationes adhiberi posse, eoque sine peculiarem ejus fabricam excogitaverit, cujus delineationem pariter jam antè hac exhibuimus in *Act. loc. all. pag. 106. fig. 5.*; tamen cum postea temporis rem hanc, quam tunc in idea saltem communicaverat, reapse effectui dederit, machinamque ejusmodi, aliquibus tamen mutatis, construi sibi fecerit, haud pigebit ejus descriptionem, qualis nunc ab ipso proponitur, denuo huc transcribere. Est itaque in *Fig. 5. AA* cylindrus cavus major, continendæ aquæ dicatus. *BB.* lebes interior pro recipiendis materiis destillandis. *CC* circulus ex ære fusus sat crassus, cum foramine in medio, per quod transiens lebes *BB* eidem exactissime ac firmiter adferruminatur. *DD* annulus ferreus perquam validus, circumdans aperturam lebetis *BB*, aptatusque super circulum *CC.* *EE* duæ appendices aut ansulæ annuli *DD*, quibus mediantibus annulus hic ferreus firmari potest ope paxillorum ferreorum ad pegma ferreum *GGGG*, attractusque dein ope cochlearum *FF*, valide premit circulum *CC*, eumque facit exacte claudere aperturam cylindri *AA.* *HH* est vasculum, cujus orificium diligentissime adplicatur aperturæ lebetis *BB*, idque ope cochleæ *LL*, vas vero hoc vel ex vitro fieri potest, vel ex metallo.



tallo. *MM* tenuis tubulus epistomium habens cum clave versatili, quo mediante aer extrahi potest e lebeti *BB*, si cui forte placeat destillare quid in *Vacuo*. *NN* duæ appendices pegmatis ferrei ad machinam totam in suspenso tenendam, ut in schemate videre est; eo nempe sine, ut eadem facili negotio sursum deorsum inverti valeat.

Sic dein spatium inter cylindrum majorem *AA*, & interiorem lebetem *BB* aqua impletur, rebusque destillandis lebeti *BB* immixtis, opus est ut craticula ænea intus ponatur, ad impediendum ne eadem deorsum labantur, ita ut tamen vaporibus liberum maneat in vasculum *HH* transire: hinc machina invertenda sic est, ut vase *HH* infimum situm habente, vapores in eo remanere queant, postquam fuerint condensati. Ignis vero applicandus est cylindro *AA*, sustentandus ibi mediante lamina ferrea semicirculari adpensa cardinibus *OO*. Consultum quoque esse ait, ut in promptu sit vas aqua frigida plenum, cui ima machinæ pars immergi valeat, quo vapores tanto citius condensentur in vase *HH*. Conducere vero prædicat machinam ita instructam, ad indagandos diversos effectus ope destillationis producendos, prout ea fiat in diversis gradibus rarefactionis & condensationis aeris: perhibet insuper, destillationes sic in *MB* citius & difficilioribus in casibus, ac vulgo, peragi posse; nec periculum adesse, quicquam sic de partibus subtilioribus & volatilibus perdendi.

Hactenus de machina Digestoria, quæ primam Tractatus præsentis partem absolvit: reliquum nunc esset, ut de altera etiam ageremus, quæ appendicis loco annectitur, ac de Antlia pneumatica amplificata & ad novos usus applicata tractat: sed quia verendum, ne nimis nunc prolixitatis arguamur, ejus recensionem in Acta mensis sequentis, Deo volente, malimus dilatam.

### *OBSERVATIONES ANATOMICÆ CIR- ca congressum, conceptionem, gestationem par- tumque ranarum.*

**Q**Uamprimum veris hujus initium post superatum brumale frigus salutarimus, vidimusque ex hybernaculis suis prodire ranas, elegans profecto nobis occasio oborta est inquirendi penitius in prima nascendarum ranarum initia, curiosa omnino, sed hactenus a nemine satis







Fig. 2.

Fig. 1.





fatis accurate descripta. Dies erat Martii mensis undecimus, qui primam suggererat foemellam utero jamjam gerentem, a quo tempore ad præsentem usque horam innumerae occurrunt foeminae pariter ac mares. Inter illas aliae quidem jamjam pepererunt, aliae adhuc utero gestant, aliae nondum compressae sunt: hi autem vel deprehenduntur in ipso coeundi actu, vel ad congressum proni, vel etiã exhausti Venere atque languentes. Sunt enim mares circa veris accessum instructi excrescentia quadam in pollice utriusque pedis anterioris callosa, quae mirabili & ex holoserico quasi confecto integumento occultatur, typhae aquaticae qua substantiam & colorem non multum dissimili. Atque hæc ipsa macula firmiter primum adhæret in iis, qui congressum appetunt: laxius adhæret ac detrahi potest in his, qui Venerem exercuerunt crebrius: decidit denique sua sponte postquam robur virile prostratum est. Interiora si spectes, notabis præcipue vesiculas feminales in viris ante coitum adeo intumescere a lactescente spermate, ut non raro sexies & ultra superare magnitudinem in figura I. TAB. VI. depictam visæ sint: qui in congressu capiuntur, non unius magnitudinis vesiculas ostendunt, sed modo majores, modo minores, pro diversitate scilicet vel ejecti vel iterum collecti spermatis: qui vero suo jam satisfecerunt officio, iis una cum pene atque pollicum callis minuuntur vesiculae feminales ita, ut vix ac ne vix quidem conspiciantur, nisi quis per ureteres apertos flatum immittat. Foemellae contra & graciles in pedibus pollices ubique servant, & vesiculis illis spermaticis penitus carent; ast testiculi longe amplissimi sunt, multis modis testes marium superantes, & oviductus cum duplici utero adeo sunt aspectu jucundi, ut nihil in rana elegantius cernatur, quam applicato ad Tubæ superius orificium tubulo, si flatu distendantur. Ovula vero in foemellarum sic dictis testiculis seu potius ovariiis reperta, ab initio exilissima sunt & pellucida, successu temporis accrescunt eadem pedetentim, coloremque suscipiunt ex lactescente lividum, in quibusdam nonnihil viridem: postmodum ovaria plane variegata deprehenduntur, aliis quidem ovulis lividis aut quodammodo virescentibus, aliis ex toto atque aliis ex parte fuscis, donec tandem nigra prorsus evadant maturitate; atque tum demum ad concipienda intra uterum ovula admodum propinqua sunt ranæ. Nimirum & ranas observavimus cum maribus suis congregientes eo etiam tempore, quo ovula



non omnino nigra, sed variegata comparuerunt, tumque non modo foemellarum tergo, quod solennius est, sed & abdomini incumbunt mares. Qui primus congressus dubio procul ad imprægnanda ovula idem valet, quod in gallinis e. g. galli coitus, h. e. ut plura simul ova foecundentur. Nam & analogia partium genitalium similem cum avibus congressum suadet, & alteratio illa notabilis, quam circa foemellæ compressæ anum videre licet, idem confirmat; ut taceamus ab iis, quos captandi ranas ergo emisimus, non imperitis rerum naturalium, sancte contestatum, non semel ranas obvenisse juxta consuetudinem volucrum vere coeuntes junctis podicibus. Verum longe curiosior est alter ille congressus, ranis peculiaris, qui nempe tum demum contingit, quando matura jam ova utero excipienda veniunt. Id vero nulli clarius, quam die 18. Martii vidimus in rana ex ulnis mariti surrepta. Cumenim abdomen ejus aperiretur, occurrebant primum in dextro latere ovula saltem bina, libere inter cor & pulmones oberrantia, in sinistro latere plus quam triginta reperiebantur similia, illæsis tamen & ovarii atque ovulis. Elevato igitur sterno, cum ad oviductus initium properassemus, visus est dexter ad duarum circiter transversorum digitorum latitudinem plane vacuus, in cujus tamen progressu plura hinc inde notabantur ovula, ejusdem magnitudinis & coloris cum his, quæ libere in thorace volutabantur. In sinistro autem latere principium oviductus adeo erat repletum, ut cum tubulum applicare voluissimus, unum alterumque redierit ex oviductu compresso ovulum, & reliqua statim immittendum omnino sufflaminarint; in reliquo oviductus progressu non nisi tria observare licuit ovula, quanquam utrumque ovarium semiexhaustum, & uterus ex utraque parte semipletus occurreret. Quapropter dubium non est, quin ovula ex ovario in oviductum atque per hunc porro in uterum usque deferantur, favente imprimis maris compressione in ranis. Neque enim amplexus ille adeo fortis ac diuturnus de nihilo est, siquidem inde etiam natas in pectore suggillationes cum excoriatione sæpius monstrarunt foemellæ, indicantes hac ratione & locum atque vires in compressione a maribus facta. Videlicet quia oviductus extremitas, secus ac in aliis observatur brutis, immobilis existit longiusque ab ovario distat, factum est egregio naturæ instituto, ut, cum venter ranæ cum sterno mobili a ganna comprimeretur, ovula ex ovario delapsa versus superiora adigantur,

ab ovi-



ab oviductus adæquato ore excipienda. Juvat autem ovulorum ingressum non parum cordis motus & pulmonum, siquidem inter inspiciendum cum pulmo elevatur, hoc ipso ovula quoque attolluntur versus cor; dum verò hoc attingunt, impelluntur continuo, ac partim a pulmonis, partim a cordis auricularumque motu tandem redduntur in quieta, donec foramen oviductus ingrediantur. Tum vero quæ semel ingressa sunt, ad uterum usque deducuntur, virtute canalis propria, quippe qui intestinis admodum similis sine dubio simili quoque motu peristaltico gaudet. Hunc in finem fibris instruitur variis, tenuibus sed egregio dispositis ordine, quæ in oviductu aperto non obscure conspiciuntur nudo etiam oculo, nisi quis forte hebetudine labores enormi. Restat itaque unicum ut expediamus, nimirum unde prod-eat albumen illud seu pellucidus liquor summeque viscidus, qui nigra circumdat ovula. Etenim quæ recenter utero excepta sunt, ab initio tantillum liquoris illius admixtum habent; augetur nihilominus hic ipse indies adeo, ut tandem pondus ovulorum omne superet. Adhæc mirum est, *visciditatem eam non tam accrescere cum numero ovulorum in uterum delapsorum, quam supervenire potius, postquam exhaustis ovarii uteris omnino plenus est: ne dicam obvenisse nobis ranam, in* cujus sinistro utero perfectum jam ex omni parte sperma detinebatur, in dextro tamen nuda fere apparebant ovula, fortasse tardius huc delata ob inæqualem maris compressionem; siquidem ejus luculentum in pectore matris vidimus testimonium, excoriationem puta non in utroque sed sinistro saltem latere conspicuam. Sed ad rem: a mare injici liquor hic viscidus non videtur, quia talis in ejus vesiculis spermaticis non invenitur, sed fluidus magis & lacteus. Neque ex altera parte maternus id promittit uterus, utpote cujus substantia pure membranacea est & tenuis admodum, si duplicaturam ejus, qua lumbis annectitur, excipias. Nec denique ovulis vel in ovario, vel dum in cavo ventris fluctuant, quicquam accrescit; ergo superest unice, ut in oviductum inquiramus. Favet autem huic primo, quod reperiamus, non quidem ubique, sed hinc inde pellucidum liquorem inter ovula trajicienda permixtum. Secundo majorem illius humoris copiam vidimus circa insertionem oviductus ovulis affusam, minorem in reliqua uteri cavitate. Tertio si aperiatur oviductus, occurrit ibidem glutinosus humor, qualem in reliquo corpore nusquam reperire licet. Denique quarto



extra omnem dubitationem nos collocavit microscopii usus; hujus etenim beneficio vidimus non obscure glandulas omnem oviductus cavitatem undique contegentes. Et quemadmodum canalis ille post partum miris modis attenuatur, tum amplitudine tum substantia, ita & glandulæ hæc tum temporis longe exiliores sunt. Eædem ante ingravitationem multum majores spectantur, quando & conspectiores & crassiores sunt oviductus. Ast suavissimum plane spectaculum præbent ranarum utero gerentium oviductus, quippe qui aperti non modo glandulas offerunt satis conspicuas, sed & e glandularum poris manantem lympham. Quas enim ibidem spectandas fibras supra memoravimus, eæ glandulis his concatenatis teguntur miro naturæ artificio: interjectæ autem striæ (quales fere in extremitate digitorum nostrorum cernimus) decurrentem inde humorem & colligunt & provehunt ulterius. Posito igitur maximam requiri hujus liquoris copiam, ad fovendam ac fortassis enutriendam etiam ranarum sobolem longe numerosissimam, non deterremur attamen a jam declaratis fontibus, quandoquidem sufficere potest & glandularum illarum immensa frequentia, & ipsius canalis longitudo, quæ, si a mesenterio suo liberentur hæc intestinula, in minoribus etiam ranis dimidiam, in majoribus integram fere ulnam nostratibus usitatam attingit. Adde his diuturnitatem temporis, quo ranæ utero gerunt, non hora aut die, nedum septimana circumscriptam, & res omnis salva erit.

*Explicatio Figurarum.*

Fig. 1.

- In rana mare indicat
- F. Exerescentiam pollicis adnatam in utroque anteriore pede,
  - 2. Penem ex concursu vasorum ejaculantium exsurgentem,
  - C. Vesiculas seminales ureteribus annexas,
  - D. Testes cum renibus communicantes per vascula seminalia.
  - E. Renes cum ureteribus,
  - F. Vesicam Urinariam duplicem, turgidam flatu immisso,
  - G. Intestini recti portionem,
  - H. Sternum,
  - I. Lobos Hepatis,
  - K. Spinam dorsæ,

Fig. 2.

- In rana gravida notat
- A. Cor,
  - B. Pulmones collapsos,
  - C. Epatis portionem,
  - D. Ventriculum,
  - E. Intestina,
  - F. Intestinum rectum,
  - G. Vesicam Urinariam apertam,
  - H. Ureterem exitum, setis immisissis,
  - I. Ostia uterina,
  - K. Uterum duplicem ovis gravem,
  - L. Oviductum,
  - M. Ostium ejus superius inter cor & pulmones hians,
  - N. Ovaria exhausta.

